

KGOHEDI KE YA ENG HODIMA THABA?



Dumela feela, dumela feela,
Tsohle di lokile, dumela feela.

Ha re inamiseng dihloho tsa rona jwale.

Ntate Modimo, eo ke thapelo ya rona e tshepehang bosiung bona, ho bona tsohle tseo O di etsetsang batho tsatsing lena. Mme rea O kopa, Morena, re ke re dumele feela, ho dumela feela hore Ke Nnete, Lentswe le ngodilweng le bonahatswa ho rona. Fana ka dintho tsena, Ntate.

² Jwale bosiung bona re batla ho O leboha ka—ka Lesedi leo O re akeletseng lona Mangolong hoseng hona. Mme rea rapela bosiung bona, Morena, moleng oo wa thapelo, hore O tle o netefatse Lentswe la Hao e le Nnete.

³ Re rapella dikereke tsohle le diphutheho tse potileng di—dimaeke tse nyenyane ho haola ka ntle, ho tloha setjhabeng, ho ya kwana Lebopong la Bophirima, hodimo dithabeng tsa Arizona, tlase masabasabeng a Texas, ho ya Lebopong la Botjhabela, naha yohle ka bophara, Morena, moo ba bokaneng. Karohano ya dihora tse ngata, nakong ya rona, empa, Morena, bosiung bona re ntho e le nngwe, badumedi, re emetse ho Tla ha Messia. Rea rapela, Ntate ya Mahodimong, hore O Mo romelle Kereke ya Hao kapele. Hoba re e kopa ka Lebitso la Hae. Amen.

⁴ Le ka dula fatshe. Ditumediso tsa Bokreste ho bohole ba mona bosiung bona. Ke maswabi ha re ntse re petetsane re tletse hoo re phefumolohang ka thata. Esita le difehlamoya, leha kwana ho fehlwa moyo, ha e sebetse hakaalo, batho ba bangata haholo. Hola e le batho ba tlalang kereke ka tlwaelo, difehlamoya tseo di ne di tla le hwamisa. Empa jwale e mong le e mong o na le fene, o fehla moyo, mme sefehlamoya le sona se butswela ka matla kamoo se kgonang.

⁵ Re isa madume ho tswa Lebopong la Botjhabela ho ya Bophirima, ho metswalla ya rona e ho Kreste, e mametseng. Re isa madume kwana San Jose, Moena Borders, sehlopha se hodimo mono. Re isa madume hodimo dithabeng, Prescott, Arizona, ho Moena Leo Mercier le sehlopha sa hae se hodimo mono se emetse ho Tla ha Morena. Re isa madume ho ba Tucson, ba phuthehileng bosiung bona, ba emetse ho Tla ha Morena. Tlase Houston, Texas, ho bao ba emetseng ho Tla ha Morena. Hodimo Chicago, ho bao ba emetseng ho Tla ha Morena. Hodimo Lebopong la Botjhabela,

New York le Connecticut, le dihlopha tse kgolo hodimo mono, tse emetseng ho Tla ha Morena. Ha re na sebaka sa ho ba dudisa mona, ka hona re tlamehile ho ba romella Lentswe ka—ka mokgwa wa fonofono. Re isa ditumediso ho Moena Junior Jackson bosiung bona, le sehlopha sa hae tlase Clarksville. Moena Ruddell, hodimo mmileng wa mashome a tshelela le pedi, le ho sehlopha sa hae, ba emetseng ho Tla ha Morena. Mme re bokane mona bosiung bona kerekeng ya lehae, tabenakeleng, re emetse ho Tla ha Morena.

⁶ Mme jwale, mohlomong bongata ba lona bo ne bo se ditshebeletsong hoseng hona. Empa ke tshepa ha e mong le e mong, ya neng a le siyo, a tla fumana teipi eo, hoba ke dumela e ne e le Molaetsa o otlolohileng ka ho fetisisa ho kereke haesale ho tloha ho—ho Molaetsa wa *Benghadi, Ke Nako Efe?* Ke ile ka utlwa tlotso ya Moya, ka utlwa ke etellwa ho bua seo ke se buileng. O ne o le molele, empa ka utlwa ke etellwa pele ho etsa hoo. Mme ke nahana hore Morena, ka Lentswe la Hae, o bontshitse hora eo re phelang ho yona. Mme re etse bonneta ba hore re utlwisia dintho tse mohlolo tsena tse etsahalang. Le a tseba, Bibele e itse, “Ba bohlale ba tla utlwisia.”

⁷ Empa ditjhaba le batho ba tla “fokola le ho hlalefa.” Nahangan feela, mo-Amerika ya tlwaelehileng jwale o dilemong tse mahareng, dilemong tse ka bang mashome a mabedi, ho fokola le ho hlalefa. Ba ne ba se na dijete mehleng eo, le—le dimisale tsa atomo, empa ba ne ba phela haleletsana ho feta. Re eketsa ho fokola le ho hlalefa, mme bohlale ba rona ke bona bo tla re timetsa. Re tla itimetsa. Hase Modimo ya tla re timetsa; bohlale ba rona bo tla re timetsa. Esale ho le jwalo, mme ho tla boela ho be jwalo.

⁸ Jwale, ha Morena a ratile, hoseng ha Sontaha se latelang, ha ke tsebe seo ke tla bua ka sona, empa ke tshepile ho Morena, ha A ka re dumella ho phela mme ho se letho le hlhang, mme e le thato ya Hae, re ikemiseditse ho bua Molaetsa o mong Sontaha se hlahlamang hoseng, ho rapella bakudi bosiu ba Sontaha se hlahlamang. Ebe lo tho e ntaela ho kgutlela hae Arizona, ho nka lelapa hore bana ba tle ba ngodise sekolong. Ke moo le tla...Re tla le tsebisa, ha re kgona feela, ka dikopano ha di ntse di hola, kapa ka dinako tseo re...dibaka tseo re ikemisetsang ho ba ho tsona. Ka hona, Modimo a le hlohonolofatse bohle.

⁹ Jwale bosiung bona, ka ho tseba hobane ke...Ke morao ka metsotso e leshome le metso e mehlano, le ho qala, kotara pele ho robedi mona Jeffersonville; mme e batla e le kotara pele ho robong Lebopong la Botjhabela, mme hape e ka ba hora ya bohlano Lebopong la Bophirima. Ka hona mona re se re batla re dikellwa ke letsatsi. Mme ke batla ho bua le lona ka tshebeletso e kgutshwane feela, ho leka ho fumana tlotso ya Moya, mme ke ntoo bitsa mola wa ho rapella.

¹⁰ Mme ke batla phutheho e mona, esita le phutheho e bokaneng dibakeng tse ding, ho fumana monna ya itseng, moena ya itseng ya tlotsitsweng ke Moya; mme ha re qala re rapella bakudi, ho tloha le ho beha matsoho hodima ba ka phuthehong tsa lona. Hopolang, Modimo ke motlalahohle; O hohle. Ka hona, tlase Texas, hodimo California, hodimo Arizona, hohle moo le leng teng, behang matsoho hodima bao ba kulang ha re qala re rapella bakudi. Mme ke tiile hore Modimo o tla utlwa le ho arabela thapelo.

¹¹ Ke ntho e mohlolo, Sontaha se fetileng bosiu, mme tlolo e ntse e tsweletse, mme Moya o Halalelang...Ehlile e ne e le ntho ya tonana. Ke sa ka ka tshwara e—e mola wa temoho ya meya ka dikgwedi le dikgwedi, esale ke tloha mona ka nako e nngwe. Le ho nyolohela mono tlasa tshepiso...Ha o tsebe hore O tla e etsa na. O ke ke wa re O tla e etsa. O mpa o tlameha ho nyolohela mono le ho ema. O ikemetse a nnotshi. O etsa seo A se batlang. Empa ho ema mono le ho bona ho lebella seo A tla se etsa, ebe moo o E utlwang e fihla hodima hao jwalo.

¹² Mme qetellog ya—ya kopano, ke ne ke sa tsebe hore e ne e le mang, empa ha ba le e—e monna kae-kae a le molelele, a le lefatla ka hodimo, mme e le motho ya kulang haholo.

¹³ Mme yaba hantle pheletsong, ho hlaha monna mona kalaneng, mme a inamisitse hloho ya hae, mme eka o hlomohile, a itshwere mpeng. Mme ka nahana hore e tshwanetse e be e le monna eo wa pele kapa monna wa bobedi, kapa neneng feela moo ke mo rapeletseng, hoba o ne a le lefatla mme a inamisitse hloho ya hae; monna ya ditho, a name. Empa ka sheba ka hohle mme ka fumana monna eo a dutse mono, empa o ne a nyakaletse. Ka nahana, "E hokae?" Ke sa kgone ho etsa qeto moo e ne e le teng. Ke ne ke e utlwa mme ke bona monna ka pel'a ka.

Ka e utlwa e hulela ka mona, mme e hlaha ka morao. Ka sheba Moena Neville le ba babedi bana ba dutseng mona, e ne e se bona. Ka re, "Monna eo o ka hara phaposi eo ya kolobetso morao mono." Mme lea tseba e ne e le mang? Moena Shepherd. Lebaka leo ke sa kang ka mo elellwa, o ne a dutse morao mono a inamisitse hloho ya hae, a ntse a rapela.

¹⁴ A nahana hore o tla shwa, esale a nahana ntho eo diveke tse mmalwa tse fetileng. Mosadi wa hae o ne a itse a reke dieta tse ntjha, mme a re, "Nke ke ka di hloka. Nke ke ka phela mona halelele hakaalo."

¹⁵ Mme o kopane le nna tsatsi le leng ka hara...hodimo mono jareteng, ya Moena Wood, a hweeditse a rorisa Modimo. Ho re, "Ke ja bacone, mahe, ditamati, ntho efe eo ke e batlang."

¹⁶ Mme a tela setulo sa hae ka boikokobetso, a tloha ho ya motsheo kwana ho sutha tseleng, le ho rapela. Le a bona, ha le hloke setlankana sa thapelo, le mpa le hloka tumelo feela. Le a bona?

Jwale, ke ne ke sa tsebe hore o fodile kapa tjhe, ka mpa ka re, “E—e monna, ya rapelang, o na le ho phoso.” Kea kgolwa E bitsitse seo e neng e le sona, “Bothata ba mala, mme o ntse a rapela morao mona. Morena Jesu o a o fodisa.” Jwale, ke phetho seo ke ne nka se bolela. Kgulo e ne e le ya hoba o ntse a rapela. Ke ne ke e bona, empa se etsahalang ha ke se tsebe. Le a bona?

¹⁷ Empa ha o E utlwa e kgutla, motho mang le mang o a hlokomela, ha E re, “HO RIALO MORENA,” le a bona, ha e sa hlola e le nna ya buang he; ke Yena.

¹⁸ Empa kamehla ke re, “Jesu Kreste o o foidisitse,” ke Nnete e tiileng. “A tetekwa ka baka la makgopo a rona, re foidisitswe ka metopa ya Hae.” Lea bona? Lea bona?

¹⁹ Empa ha E tla e le, “HO RIALO MORENA,” mme e o bolella seo tshwanetseng ho se etsa le se tla etsahala, sheba ntho eo, e tla ba jwalo.

²⁰ Empa ha ke re, “Jesu Kreste o a o fodisa le ho o phedisa,” o e dumele, hoba O se a e buile. Ke mpa ke pheta seo A se buileng.

²¹ Mme pono e mpa e le ho pheta seo A se bontshitseng. Le a utlwisia?

²² Jwale re ke re potlake mme re kene hantle Lentsweng, hoba kea tseba hore bongata ba lona bo teng mona, bo tla tsamaya dimaele tse telele bosius bona. Ke rapela Modimo ho le hlohonolofatsa, ho le thusa le ho le baballa ditseleng. Mme jwale ke lakaditse ho phetla ho Mohalaledi Mattheu, kgaolong ya 21, le ditemana tsa 1 ho fihla ho 11, ho Mohalaledi Mattheu. Mme, jwale, ha le sa tshwara Bibele tsa lona, kapa ha le batla ho ngwapa Mangolo ana, ho itoketse.

²³ Mme jwale ho lona ba sa utlwang Molaetsa hoseng hona, mme le ena le sehatisa-mantswe; ha re ananyo, ho rekisa diteipi. Ha re ke re ananya, ho rekisa letho. Ka dinako tse ding kopanong e kgolo ba ye ba tsebise hore ba na le dibuka tse mmalwa morao mane; ha re etse letho ka tsona. Moena Vayle ke mongodi. Diteipi, monna ya tsamaisang kgwebo ya diteipi mono o tla le bolella, ha re etse tjhelete ka diteipi. Ha re...Ha se “diteipi”; ke Molaetsa. Mme ha monna a nahana kelellong ya hae hore ke tjhelete, ha a sa tla hlola a etsa diteipi. Ke hantle. Ke ne ke ntse ke botsa ka yona, nka re diteipi tsa rona di rekiswa, ka tlasa didolara tse hlano, kapa ntho e nngwe, tse tharo kapa tse nne, kapa ntho e kang eo. Ho thweng? Tse tharo kapa tse nne, bakeng sa diteipi tse kgolo tseo, tse telele.

²⁴ Mme moreri e mong, ke ile ka botsa ka e nngwe ya diteipi tsa hae, mme keha e le didolara tse robong, mohlomong molaetsa wa metsotso e mashome a mabedi, kapa a mararo.

²⁵ Ka hona kea bona hobane Moena Sothmann wa rona morao mane ha a rue, mang le mang wa bona, ka diteipi tsema tseo ba—ba di ntshang. Le a bona, ba etsa ho lekaneng feela ho tswelapele. Re ke ke ra ba kopa ho di etsa mahala, hoba ba lokela ho reka diteipi le ntho e nngwe le e nngwe. Mme metjhini e theko e thata, ho qosa didolara tse ka bang dikete tse leshome ho lokisetsa ho etsa diteipi tseo, le ho qala feela.

²⁶ Jwale, ke utlwisa kapele hore ke...ho se ho tsebisitswe. Empa ho tla tshwarwa kopano ya teipi hape. Kgafetsa le kgafetsa re...diteraseti, ha ho moo ke amanang le yona ho hang. Ebile ha ke...ha ke eso etele kopano efe feela. Hase—hase dintle kapa dimpe. Ke bona ba kgethang; diteraseti ke tsona tse qetang ka monna ya latelang ya tla etsa diteipi, mme ba mo ngolla lengolo. Ke phetho seo ke se tsebang ka yona. Ke bona ba hlokomelang hoo, hoba ha ke kgone le ho hlohonolofatsa masea ha ke sa bua ka ho hlokomela diteipi, ka hona, kapa ho kolobetsa.

²⁷ Ka hona kelello ya ka e tsepamisitswe hodima Molaetsa ona, ke Kgulo eo ya Boraro, mme ke yona eo ke tshwanelang ho tshepahala ho yona le ho e hlompha.

²⁸ Mattheu 21:1 ho fihla ho 11. Ke buile hoo hore le tle le shebe...kapa ho phetla Mangolong.

Yare ha ho... Yare ha ba atametse Jerusalema, ba se ba fihlile Bethefage, thabeng ya Mehlwaare, Jesu a roma barutuwa ba hae ba le babedi,

Mme a re ho bona, Eyang motsaneng oo le o lebileng, etlare le sa fihla le tla be le fumane esele e holehilweng, e nang le petsana ya yona: le di lokolle, mme le ntlistetse tsona.

Etlare ha motho a le botsa taba, le tle le re ho yena, Morena wa di hloka; mme o tla phakisa a di romele.

Hohle hoo ho entswe, hore ho tle ho etsahale ho boletseng ke moporofeta, ya itseng,

Bolellang baradi ba Sione, le re, Bona, Morena wa hao ke eo ya tleng ho wena, a le bonolo,...kaletse esele, petsana ya esele e lemaletseng joko.

Ebile barutuwa ba ya, ba etsa ka moo ba boleletseng kateng ke Jesu.

Ba tlisa e—e esele, le petsana ya yona, mme ba ala diaparo tsa bona hodima yona, mme yena a e kalla.

Bongata bo boholo ba ala diaparo tsa bona tseleng; le ba bang ba rema makala a difate, ba a ala tseleng.

Mme bongata bo eteletseng pele, le bo latelang, ba howa, ba re, Hosanna ho mora Davida: Ho bokwe ya tleng ka lebitso la Morena; Hosanna mahodimong a hodimodimo.

Eitse ha a kena Jerusalema, motse wohle wa hwerehana, wa re, Enwa ke mang na?

Matshwele a re, Ke Jesu moporofeta ya tswang Nazaretha wa Galelea.

²⁹ Jwale ha nka batla ho qotsa theron, bakeng sa metsotso e ka bang mashome a mararo pele ho simollwa ka mola wa thapelo, nka rata ho nka hona e le mohlodithero: *Kgohedi Ke Ya Eng Hodima Thaba?*

³⁰ Jwale, ebile letsatsi la mokgathala, le ferekanyang, mme e le letsatsi le sa tlwaeleheng. Re fumana Jesu mona a tla Jerusalema, a itokiseditse ho etela paseka. Mme paseka ke moo ho nong ho bolawa konyana ya paseka, mme madi a ne afafatsha hodima setulo sa mohau bakeng sa—sa pheko ya—ya batho. Mme A tla a tswa Bethafage le ho fihla hodima Thaba ya Mehlwaare, e okamelang leralla le leng moo Jerusalema e ne e hahuwe teng. Mme eitse ha A sheba, le ho tseba hore lena e ne e le leeto la Hae la ho getela.

³¹ Mona e le mohla A tla neelwa matsohong a batho ba baetsadibe mme ba ne ba tla Mmolaya. A tla shwa lefu le nyarosang ka ho fetisa leo motho ya buswang ke lefu a kileng a le shwa, le ho patwa. A tla ekwa ke ba Habo ka Sebele, ba bang ba bona ba eme le Yena hantle. Mme Yena, kaha e le Modimo, o tsebile se ka dipelong tsa bona, a tseba esale ho qaleng ya tla Mo eka. Le ho tseba hore monna ya nang le Yena a dutse pela Hae le ho Mmalla ditjhelete tsa Hae, le jwalo-jwalo, ho tseba hobane monna eo o tla Mo eka. Le ho tseba hobane sefapano se sehloho sa Roma se Mo emetse ka ntle mono. A tseba hobane metsi a Hae mmeleng wa Hae le Madi a mmele wa Hae di tla arohana, le hobane Madi a mmele wa Hae a tla rotha phatleng ya Hae, dikgororo tse kgolo tse kang mofufutso. A tseba sohle se Mo laletseng. Mme O eme hodima thaba, a shebile hodima Jerusalema.

³² Batho ba letsatsi leo, bo...hoo ba ho bitsitseng tsatsing leo, “sehlopha sa borapedi sa batho ba maemo,” ba ne ba Mo hloile. Dikereke tsa letsatsi leo di Mo hloile mme di Mo latola, le ho qosa bohole ba na ba Mo mamela. Mme ha eba ba tloha ba etela matsholo a Hae, ba kgaolwa ka potlako bolekaneng ba kereke. Ha ho makatse ha Lengolo le itse, “O tlide ho ba Habo ka Sebele, mme ba Habo ka Sebele ha ba ka ba Mo amohela.” Bona ba neng ba tlamehile ho Mo rata, ba tshwanetse ba be ba Mo tsheheditse, ya eba dira tsa Hae, tse bohale ka ho fetisisa.

³³ Mme sehlopha sa Hae a se entse ka sekga kgatha sa mafutsana, batshwasib a dihlapi, balekgetho, batho ba sa rutehang. Bibele e itse ba bang ba bona “ba ne ba sa bala, ba sa ruteha.” Ba bang ba sitwa le ho saena lebitso la bona. Ha A ka a ya ho dikereke ho fumana batho ba Hae.

³⁴ Mme ha A ka a dumellana le baetapele bafe feela ba kereke. Mme, ntle le moo, A latela wona mokgwa wa moporofeta. A nyatsa ntho yohle eo ba neng ba e etsa, jwaloka ba ttileng pele ho Yena; hobane bao e ne e le karolo ya Lentswe, mme Yena e ne e le Lentswe ka botlalo ba Lona.

³⁵ Empa hara tseo tsohle, mongwaheng o mong le o mong le moporofeta ka mong ya kileng a hlaha kapa ya tla hlaha, ho tla ba le palo e badilweng ya batho ba reretsweng ho utlwa Molaetsa oo, mme ba tla O latela. Bao ha ba natse matshwele. Ba nyemotsa ditshehollo tsa mosadumeleng. Ha ba—ha ba phehe kgang le bona. Ba etsa ntho e le nngwe, hoo ke ho dumela le ho tshwara karolwana ka nngwe ya Wona ha ba kgona, ho O thophothetsa jwalo ka Maria a na dutse maotong a Jesu.

³⁶ Mme Maretha o na a Mo lokisetza tinara, mme Jesu a re ho yena, “Empa, Maretha, o itshwenya ka dintho tsa bophelo, athe Maria o batlide dintho tse molemo,” le a bona, dintho tsa Bophelo bo sa Feleng.

³⁷ Jwale, re fumana boholo ba batho ba neng ba utlwisisitse... Ba ne ba se na dingolwa jwalo ka rona kajeno, ba se na thelebishene kapa mehala, kapa le letho, tsa letsatsi leo, empa ba tsebiswa ke hlokwana la tsela hobane O tla ba teng pasekeng. Hoba bongata ba batho, kaha e ne e le batho ba moyo, ba tsebile Yena e ne e le Konyana eo ya paseka, hobane A ne a ba boleletse se tla etsahala.

³⁸ Mme hape, ehlide, ka ho tseba hore O tla ba teng mono, mme ba Mo rata ka moo ba ne ba etsa, ba ne ba Mo emetse ke hona. Mohlomong ho ena le letshwele le hatellanang, ho sututsana ho qala kgorong e nngwe ho isa ho e nngwe, ba shebile ka nqa tsohle, hoba ba tsebile A tla hlaha ho e nngwe ya dihora. Ba ne ba lebeletse.

³⁹ Ba bang ba ipotsa lebaka la batho bana ba titimelang kgorong le ho ya kgorong. “Kgochedi ke ya eng?”

⁴⁰ Mme ba shebe ka *nq'ena* le ho sheba ka *nq'ané*, ho fuputsa. Eka ba batlana le ntho e nngwe, tlasa tebello ya ntho e nngwe e tla etsahala.

⁴¹ Oh, ka moo nka ratang ho fetola theroyaka metsotso e mmalwa le ho bua sena, hore ke lona lebaka la kajeno. Batho ba Mo shebeletseng ho fihla ba dutse tlasa tabatabelo e kgolo le ditebello. Re ka e utlwa, kgatello. Mme ba a batla, ba shebile motsamao ka mong le pontsho ka nngwe, ho e bapisa le Mangolo.

⁴² Mme yare ha ba bona dintho tseo tsohle tse boletsweng ka Yena, ho ya fihla pheletsong hantle, ba tseba hobane bofelo bo haufi. Ba ne ba batla ho ba teng mono, ka hona ba ela hloko. Karolo e nngwe ya matshwele e ne e Mo emela, palo e nyenyane. Ba bang ba le kgahlano le Yena, boholo ba bona, dipesente tse mashome a robong di le kgahlano le Yena.

⁴³ Mme ho batla ho le jwalo kajeno hara matshwele a borapedi, ha ho theohelwa tlase Lentsweng le ho Kreste, ho batla ho ena le pesente e le nngwe e tla Le dumela. Karolo e nngwe e ke ke ya Le natsa, ho sa tsotellehe se entsweng, ba ka mpa ba etsa motlae wa mofuta kapa ba Le hlabe ka sesomo. Ho batla ho tshwana. Nako, dintho ha di fetohet hakaalo, nalane e phikoloha e boela e iphetra.

⁴⁴ Be, re fumane hoo ho raositse tsitsipano ya methapo. E ne e loketse jwalo. E tshwanetse ho etsa hoo. Ba ne ba lebeletse, ba ipotsa seo A tla se etsa ha A fihla mono. Ba batla ho ba teng mono ho thonaka ntho efe feela A e entseng. Ba ne ba E batla. Ba batla ho E bona. Ba ne ba dumela ho Yena. Ba bang ba ne ba utlwile hore O a tla, mme ba nyolohela mono ho soma ka Yena. Ka baka leo ka mora ditsitsipano tsohle tsa tebello, letsatsi le sa tlwaeleheng haholo, nako e sa tlwaeleheng haholo, dikereke di robetse, methapo ya batho e phahame, ho ena le batho ba bangata mono, yaba e a etsahala!

⁴⁵ Hodima Thaba ya Mehlwaare ha tla esele e nyenyane, e tshweu ya tla, e theoha lerallana, sehlopha sa batho se hweeditse ka bohlaha, ba rema mahlaku a difate tsa dipalema, ba lahlela diaparo tsa bona tseleng, ba hweletsa, "Hosanna ho Mora Davida ya tlang ka Lebitso la Morena!" Bo...mulete o monyenyane ona, Mokalli oa wona e le mang ha e se Messia ya tlotsitsweng wa Modimo wa hora.

⁴⁶ Modimo, lekgatheng leo, O ne a etsa'ng? Kgohedi e hodima thaba mane ke ya eng? Ke Modimo o etsa histori, mme Modimo o phetha boporfeta. Mme hoo ho raosa kgohedi ka mehla. Ho tsosa banyefodi bohole, manong (a Molaetsa wa hoseng hona), le dintsu hape. Le a bona? Ba phutheha mmoho ho fumana se etsahalang. Ba bang ba tliswa ke ho rata ditaba, ba bang ba tlil'o fumana phoso, bang ba tlil'o nyatsa. Ho phuthehile mefuta yohle, jwalo kaha re boletse hoseng hona: badumedi, baikaketsi, le bomosadumele. Ke eng hodima thaba? Boporfeta bo a phethwa. Jwale re tla bona se etsahalang.

⁴⁷ Jwale, Bukeng ya Zakaria, kgaolong ya 9 le temaneng ya 9. Zakaria, e mong wa baporofeta, o buile moyeng, a bolela sena.

Nyakalla haholo, oho baradi ba Sione; o tshele ditlatse, oho baradi ba Jerusalema: bona, Morena wa hao ke enwa o tla ho wena: ke ya lokileng,...ya nang le poloko; ke ya ikokobetsang, ya kaletseng esele, e leng petsana, namane ya esele e tshehadi.

⁴⁸ Jwale, molato e ne e le ofe ka bangodi bao? Molato e ne e le ofe ka baprista bao? Molato e ne e le ofe ka batho bao ba barapedi? Hona ho ngotswe dilemo tse makgolo a mane le mashome a robedi a metso e supileng pele e etsahala, ka moporfeta ya netefaditsweng, mme e se e ngotswe ka dingolwa le ho bitswa Bibele, mangolo a phuthetsweng a

Testamente ya Kgale. Hobaneng ba sa bona hore ke boporofeta bo phethwang? Ka lona lebaka leo ba sa e boneng kajeno. Ba ne ba nkile Lentswe la Modimo mme ba Le etsa le se nang matla bathong, ka ho ruta (e le meetlo) meetlo ya batho e le Thuto.

⁴⁹ Mme hola bangodi, bareri, badisa, banna ba moyo (ba bitswang jwalo), ba tlotsitsweng, ba ne ba ka bala Bibele feela, ba ne ba sa tlo ipotsa se etsahalang, ba ne ba tla tseba seo E leng sona. Modimo o phetha Lentswe la Hae!

⁵⁰ Histori e ne e etswa, seporofeto se ne se phethwa. Poloko ya lefatshe e ne e fihla, letsatsi le leholo leo baporofeta bohle ba ne ba le lebeletse. Hohle ho neng ho le lebitleng ho ne ho lebeletse letsatsi leo (kgidi, e nahanneng), bohle ba shweleng, hohle ho lokileng madi a bashwelatumelo le baporofeta.

⁵¹ Etswe, O ne a sa tswa hweletsa, "Jerusalema, oho Jerusalema, wena ya tlepetsang moporofeta e mong le e mong eo Ke mo rometseng ho wena, le ho bolaya ba lokileng, Ke ratile hakae ho o bokanyetsa jwalo kaha kgoho e ka etsa, ho ditsuonyana tsa yona, empa o hanne. Empa jwale hora ya hao e fihlile."

⁵² Hohle ho neng ho le lebitleng, Abrahama, Isaaka, Jakobo, baporofeta bohle, ba ne ba emetse hora ena.

⁵³ Mme kereke keha e foufaletse Hona. "Ke mang enwa ya tsosang lerata lena lohle? Thaka leo ke mang?" Ba kile ba re, "Ana enwa hase mora wa mmetli na? Re a Mo tseba. Bohlale bona O bo fumane kae? Kgele, ha re Mmone a hokahane le tse ding tsa dikolo tsa rona. Ha re tsebe dibuka tseo A ithutileng ka tsona. Ke Mang?"

⁵⁴ E ne e le karabo ya seporofeto sa moporofeta. Ke Enwa a tla, a kaletse petsana ya ese. Kgochedi e kakang! Modimo o ne a phetha Lentswe la Hae le tshepisitsweng, hora eo esale e lebella dilemo tse dikete tse nne. Ho Genese, kgaolo ya 3 le temana ya 15, Modimo o ne a boletse pele, "Peo ya mosadi e tla kgoba hloho ya noha, empa hloho ya noha e tla mo loma serethe," seporofeto seo ho theoha le Bibele se ne se boletswe ka ho tla ha Monna enwa.

⁵⁵ Mme hase kgale haholo mona ha ho hlaha moporofeta ya ileng a ema hara bona, e le moporofeta ya netefaditsweng, Zakaria, mme a bolela, ho re, "Lona baradi ba Jerusalema le lona baradi ba Sione, nyakallang, hlabang ditlatse, hweletsang, hobane Morena wa lona o tla ho lona, a le bonolo, a ikokobeditse a ithobile, a kaletse petsana ya ese."

⁵⁶ Mme ke mona batho bao ba badileng Lengolo leo, letsatsi le letsatsi, ba Mmona a tla a kaletse, mme ba hweletsa, "Enwa ke Mang?" Le a bona? Modimo o ne a phetha Lentswe la Hae ho batho ba neng ba loketse ho tseba seo Le neng le le sona, empa ba ne ba sa Le tsebe.

⁵⁷ Ha Modimo a phetha Lentswe la Hae, ka mehla Le raosa kgohedi, le etsa jwalo ka mehla. Le raosa kgohedi, hobane ha Le a tlwaeleha. Ehlide ha Le a tlwaeleha, ha A phethahatsa Lentswe la Hae ho tsamaiso ya mehla, hobane tsamaiso ya mehla ya jwale ha e Le dumele. Ba na le tsela ya bona.

⁵⁸ Jwale, re a bona, ha re kgutleleng morao Mangolong mme re nke tse ding tsa diketsahalo tse sa tlwaelwang, metsotso e mmalwa feela hape, mohla Modimo a ne a phetha boporofeta ba Hae. Ha Modimo a bua ntho, O tla e etsa. Mahodimo wohle le lefatshe di tla feta, empa Lentswe leo le ke ke la feta. Ka baka leo ka tlwaelo Le hlahisa tema, tema e sa tlwaelwang.

⁵⁹ Lemohang ka moo e leng bosawana Lentswe la Modimo ho—ho batho ba tshwanetseng ho Le dumela, mme leha ho le jwalo ha Le a tlwaeleha hoo ba bileng ba hweletsa, “Tjhe, Hona ke eng? Ntho eo o e nkile kae? Enwa ke mang? Hona ke eng?”

Athe, ba ne ba loketse ba be ba hweletsa, “Hosanna ho Kgosi e tlang ka Lebitso la Morena!” Empa e ne e le sehlotschwana feela se etsang hoo, sehlotschwana feela.

Hodima boporofeta ba dilemo tse dikete tse nne, ba ntho e kgolohadi e ka hlahelang setjhaba, hobane tshepo yohle ya bafu e ne e itshetlehile ho Yona, bokamoso bohle bo robetse ho Yona; mme batho ba barapedi, ba ipoletseng ba Le dumela, ba ne ba howa, “Enwa ke Mang? Mme ke kgohedi ya eng?” Ntho e sa tlwaelehang! Ho batla ho tshwana, ha e ke e fetoha, ha ea tlwaeleha hona jwale.

⁶⁰ Ha re boneng tse ding tsa dintho tse sa tlwaelehang, jwalo kaha ke sa tswa bolela. Kgohedi e ne e le ya eng pejana feela kahlolo e wela lefatshe le ho le timetsa ka metsi? Monnamoholo, ya ka bang dilemo tse lekgolo le mashome a mabedi, o haha seketswana athe ha ho metsi a ho se sesisa. Hodimo mono dilemo tse ngata, a eme monyako, a tea ka hare, ka hare, a se neta ka boka ka hare le ka ntle, le ho re, “Lefatshe le tla metswa ke metsi,” mongwaha o moholo wa mahlale.

⁶¹ “Ke ho kokotela ha eng hodima leralla mono?” “Kgele, ke monnamoholo ya bitswang Nohe, mme o eme hodimo mono, lehlanya la kgale. Qheku leo le eme halelele letsatsing. O batotswe ke letsatsi. O lahlehetswe ke kelello ya hae. Mme o haha ntho eo a e bitsang ‘areka’, mme o re metsi a tla tswa hodimo mona moo ho seng metsi, mme a tla phahamisa batho bohle ka mathoko; mme motho mang le mang ya sa utlweng molaetsa wa hae, le motho mang le mang ya sa keneng arekeng eo, o tla kgangwa ke metsi. Na le kile la utlwa ntho e kang eo?” E ne e le kgohedi e sa tlwaelehang!

⁶² Kea kgolwa ha batho ba ne ba batla ho iqabola hamonate, ba ne ba nyolohela mono mme ba ema pela monyako wa areka

le ho tsheha. “Kgele, o itse e tla na dilemong tse lekgolo tse fetileng! Ntatemoholo o mpoleletse a re o utlwile hodimo mona o re e tla na, mme o sa ntse o kokotela sekoto seo sa kgale sa patsi hodimo mona. Hobaneng o sa iphumane?”

⁶³ Empa e ne e le Modimo a itokisetsa ho thasisetsa tshepiso le ho phethahatsa seporofeto seo moporofeta wa Hae a se entseng. E hlolla haholo! Modimo o phetha tshepiso ya Hae ho Nohe, ha ba bang ba ntse ba tsheha. Hape Modimo o ne a itokisetsa ho etsa histori ho bontsha ba bang, esita le ho fihla letsatsing lena hore O boloka Lentswe la Hae! Ho sa tsotelehe ka moo e bonahalang e se nnete, le ho haellwa ke mabaka, O sa ntse a boloka Lentswe la Hae. O ne a etsa mohlala, ka leqheku leo le otellelang areka eo, ho batho bana mona Amerika bosius bona le ho lefatshe lohle. Ho sa tsotelehe seo mahlale a se buang, seo ba se buang, *hona, hane*, kapa ho *hong*, O sa ntse a boloka Lentswe la Hae. O ne a etsa histori.

⁶⁴ Kgochedi e ne e le ya eng tsatsi le leng; ha ho hlaha ntho e sa tlwaelehlang felleng, mme ho na le sehlahlha se tukang. Mme moporofeta wa mmalehi a eme tlase lehwatateng. Ha a ka a utlwa lentswe, ha a ka a utlwa modumo, empa a sheba mme a bona ntho e sa tlwaelehlang hodima thaba. Modimo o ne a leka ho hula maikutlo a hae. Ho a tshwana le kajeno!

⁶⁵ Modimo o ne a le mothating wa ho phetha Lentswe la Wona, ka moporofeta wa Hae Abraham, “Peo ya hao e tla jaka dilemo tse makgolo a mane lefatsheng lesele. Ke tla ba ntsha ka letsoho le matla.”

⁶⁶ Mme O ne a hlophisetsa monna mosebetsi, jwaleka ha A ne a lokisetsa bohole ba tla dumela areka ya setshabelo. Modimo a tukisa sehlahlha sena, mme modisana enwa wa dinku, Moshe, a re, “Ke tla fapohela ho bona se lekanngwang ke mohlolo ona.” Mme hoba A fihlise Moshe sehlahleng, A buisana le yena.

⁶⁷ E ne e le kgohedi ya eng hamorao ka holong ya Pilato, mohla modisa enwa wa dinku a lahlelang molamu mme wa fetoha noha? Modimo o ne O phetha tshepiso ya Wona ho Moshe. E ne e le kgohedi ya eng Lewatleng le Shweleng, mohla dipere tsa Faro di ne di tshohile ka hohle, ha di bona moyo o theoha mahodimong mme o arola Lewatle le Lefubedu ho qala ho le letona ho isa ho le letshehadi; mme sekga kgathha sa makgoba, a tsamayang ka kutlo ya Modimo, a tshela mono mobung o omileng? E ne e le eng? Modimo o ne o boloka Lentswe la Wona. Ho shwa ha sutha tseleng, batho ba phelang ba tshela; homme batho ba shweleng moyeng ba leka ho e etsisa, mme ba nwela. Modimo o phetha seporofeto le ho etsa histori. Eo e ne e le kgohedi Lewatleng le Shweleng.

⁶⁸ E ne e le kgohedi ya eng tsatsi la bobedi ka morao ho moo, Thabeng ya Sinai, mohla batho bohole ba ne ba laetswe ho se atamele basadi ba bona, mohla bohole ba ne ba kopilwe ho

hlatswa diaparo tsa bona le ho ikgalaletsa, le ho phuthehela ka mathoko ho thaba moo monna ya bitswang Moshe a ne a boletse a kopane le Modimo Topalong ya Mollo? Mme Modimo o no o itse ho Moshe, “Ke tla theohela hara batho. Ke tla thasisetsa seo Ke o boleletseng sona, le hore Ke Mang. Ke tla ba bontsha hore Ke Modimo oo.” E ne e le kgohedi eo, Modimo o phethahatsa Lentswe la Hae.

⁶⁹ E ne e le kgohedi ya eng tsatsi le leng nalaneng, mohla setjhaba sena se ne se lebetse Modimo, mohla batho ba ne ba hwamme ba sa tsotelle, mohla baprista bohole ba ne ba nkile mekgwa ya sejwale-jwale, baporofeta ba porofeta ho latela thato ya baprista? Mme tsatsing leo, ka tlwaelo, ba ena le monna a le mong eo ba ne ba mo nkile e le lehlanya. O ne a bua ka basadi ba inetang ka ferefe, le ntho yohle, mme e le thaka la mofuta o ilehang. Mme thaka lena la kgale le ne le theohe mme la re ho morena, “Esita le phoka e ke ke ya bitsa . . . ya tla pele ke e bitsa.”

⁷⁰ Mme re fumana, ke hona, hobane o ne o ipatile mme a balehela hole le yona, a ba a ipata kae-kae felleng. Sehlopha seo sa hopola a ne a bolawe ke tlala kapa a timele; empa o ne a fepehile hantle, le ho noswa metsi, hape. Mme ke enwa, a theoha a ba a re, “Na lea bona hobane ke tshwere HO RIALO MORENA? Jwale, ha eba le eso ho kgodisehe, ha re nyoloheleng hloring ya thaba le ho paka hore Modimo ke mang,” ka hobane a ne a fumane pono e nngwe e tswang ho Morena.

⁷¹ A re, “Ikgetheleng e—e aletare, mme le etse, mme—mme le kgethe pholo le be le di hlabe. Ke tla haha aletare ya Morena, mme le nna ke tla beha pholo hodima ya ka. Bobedi re tla etsa sehlabelo, mme Modimo eo e leng Modimo a ke a arabele.” A ke be a sa etsa hoo hola Morena a ne a sa mmolella; o boletse jwalo hamorao, “Ke entse hona ka . . . hona hohle, ka taelo ya Hao, Morena.”

⁷² Empa ke kgohedi ya eng? Ho na le baprista ba makgolo a mane ba emeng hodima leralla, le morena hodimo mono ka koloing ya hae, ka dihlomo tsohle tsa hae le balebedi ba hae ba eme ka mathoko. Mme monna enwa wa kgale, ya mohwete, sefahleho se batla se rothofetse, a le lefatla, le meriri e lepeletse sefahlehong sa hae, sekotwana sa letlalo la nku se mo thathetse, a le mohwete hohle mmeleng wa hae, o ne a eme mono ka molamu letsohong la hae, le lefiswana la oli letsohong le leng; o ne a boletse, dilemo tse tharo le halofo pele ho moo, “Esita le phoka e ke ke ya lala pele ke e laela, ke e bitsa,” o ne a nkile sebaka sa Modimo, ka dintho tse kang didikadikwe tsa lesedi le diriti, le tsohle tseo ba buang ka tsona. “Mme ke mona lehlanya leo la kgale le eme mono hodima leralla, a nyollela batho bohole mono.” Kgohedi eo e ne e le ya eng? E ne e le Modimo ea itokisetsang ho netefatsa moporofeta wa Hae hore o nepile. E ne e le Modimo a phethahatsa seporofeto. Hape Modimo o ne a etsa histori, a phethahatsa Lentswe.

⁷³ Dilemo tse makgolo a mmalwa ka mora moo, ha hlaha monna ya tlotsitsweng ka Moya wa mofuta oo, mme a tswa felleng, a sa ikamahanye le mekgatlo efe feela; leha ntat'ae e ne e le monna wa mokgatlo, moprista ka neeletsano. Empa yena a tswa felleng, a apere lettalo la nku, moriri o kgurumeditse sefahleho sa hae. Bakeng sa ho ba moputswa, o le motsho. Kgohedi ya monna enwa ya hohetseng Jerusalema le Judea yohle e ne e le efe? Ba bang ba bona ba tswa mme ba re, "Ho na le monna ya hlaha tlase mane. O leka ho kgamisa batho ka metsi. Ke mang ya kileng a utlwa ntho e jwalo?"

⁷⁴ Ba bang ba qahamisitse ditsebe, mme ba re, "Enwa e tshwanetse e be e le Messia." E mong wa bona a re, "E ka ba e mong wa baporofeta." Ba sa tsebe seo ba ka se nahantan. Empa e ne e le eng? E ne e le Modimo ya phethahatsang Esaia 40, moo A itseng, "Bonang . . ." seo A tla se etsa matsatsing a qetelo, ka moo A tla romela mohlanka wa Hae le seo a tla se etsa.

⁷⁵ Ebe moo re fumanang, diveke tse mmalwa ka mora moo, monna eo o ne a kgodishile ka molaetsa wa hae, hoo a bileng a re, "Ho na le Ya emeng hara lona, Eo ke sa lokelang ho jara dieta tsa Hae. O tla le kolobetsa ka Moya o Halalelang le Mollo, jwalo kaha nna ke kolobeditse ka metsi."

⁷⁶ Ka tsatsi le leng, Monna e motjha ya tlwaelehileng, a ka ba dilemo tse mashome a mararo, a theoha mme a kolobetswa. Mme ha Monna enwa a tla, ha hlaha kgohedi e kakang ka moporofeta, moporofeta a itshwara ka mokgwa o hlollang mohlangu. Phutheho e ke ke ya etsa letho haese ho boha boitshwaro ba moporofeta eo ha a ne a phehisana le baprista mose ho noka.

⁷⁷ Ba re, "Ke Modimo o ahileng aletare ena. Ke Modimo o re laetseng ho etsa hona. Moshe ke yena moporofeta. Re dumela Moshe. Sehlabelo se ke ke sa fediswa."

⁷⁸ Ke utlwa Johanne a arabela, ho re, "Na ha lea bala Lengolong se boletsweng ke moporofeta Daniele, 'Sehlabelo sa ka mehla se tla fediswa'? Mme hora eo e fihfile! Na ha lea bala se boletsweng ke Esaia kgaolong ya 40, 'Lentswe la ya howang felleng, lokisang tsela ya Morena'? Ho na le diporofeto tse pedi tsa ka. Mme ntho e nngwe, na ha lea elellwa moporofeta wa rona dilemong tse makgolo a mane tse fetileng, Malakia, mohla a ne a bua kgaolong ya 3 le ho re, 'Bonang, Ke rona lenqosa la Ka pela Ka, ho lokisa tsela'? Na ha le tsebe hobane hona ho phethahatsa boporofeta?" Boporofeta bo ne bo phethahatswa!"

⁷⁹ Mme ka yona nako eo moporofeta a reteleha a ba a re, "Bonang, ke eo Konyana ya Modimo e tlosang sebe sa lefatshe!" Jwale kgohedi ke ya eng? E fetohile ho tloha ho moporofeta ho ya seporofetong sa hae.

⁸⁰ Jwale lemohang se etsahalang. Ke mona ho tla Monna ya tlwaelehileng, a sa tsejwe ke motho, mora wa mmetli, a tla a

kena metsing. Eare ha Johanne, moporofeta e moholo, a re, “Ke hloka ho kolobetswa ke Wena. Hobaneng O ka tla ho nna?”

⁸¹ A re, “Ntumelle. Empa, jwalo ka moporofeta le Lentswe, eka kgona re phethe hohle ho tshwanelehang.”

⁸² Ka hona a utlwissa hobane Sehlabelo se lokela ho hlatsuwa pele se ka hlahiswa, mme a Mo kolobetsa.

⁸³ Jwale ho hlaha kgohedi e nngwe ha A tsya metsing. Moporofeta enwa ya na a tshephahetse ho phatlalatsa mongwaha wa hae le nako, a lelala mme a bona mahodimo a phetlilwe. A bona Moya wa Modimo, eka leeba, O theohela hodima Hae, le Lentswe le reng, “Enwa ke Mora wa Ka Eo Ke kgahliswang ke Yena.” Modimo o ne a netefatsa molaetsa wa moporofeta, ke yona ntho e neng e hohela maikutlo Jordane.

⁸⁴ Moena o binne nakwana e fetileng, kapa o ne a tshwanetse ho bina, “Hodima leralla le hole-hole ho eme sefapano sa kgale se makukuno.” Kgohedi ke ya eng hodima Thaba ya Kalvari? Ha re bona lefatsho la borapedi le Mo ahlotse, mme mmuso wa Roma o Mo ahloletse lefu. Mme ke Enwa o ne a leketla pakeng tsa disenyi tse pedi, a bolawa ke lenyora, madi a phorosela mmeleng wa Hae. Ke Eo o a leketla, o a lla, “Modimo wa Ka, Modimo wa Ka, O Ntahletse’ng na?” Mme batho ba borapedi ba eme mono, ba e shebile, ba sa tsebe le hanyenyane hore seporofeto sa Testamente ya Kgale se ne se phethwa hona moo Kalvari ka nako yona eo.

⁸⁵ Davida le yena o ngodile, a etsa... a kena Moyeng jwalo ka baporofeta bohole, a etsa eka hoja ke yena. Davida a lla, Pesalemeng ya 22, “Modimo wa Ka, Modimo wa Ka, O Ntahletse’ng na? Nka bala masapo a Ka kaofela. Ba hlabile matsoho a Ka le maoto a Ka.” Davida, a bua eka hoja e ne e le yena. Homme e ne e se Davida, e ne e Kreste ka ho Davida.

⁸⁶ Mme ke mona sona seporofeto se tswileng, sa baporofeta bohole ba fapaneng, se ne se phethwa hodima Thaba ya Kalavari. Ke kgohedi ya eng hodima Thaba ya Kalvari? Modimo o phetha Lentswe la Wona.

⁸⁷ Kgochedi e nngwe e ne e le hodima thaba, e ne e le ka Letsatsi la Pentekosta, mohla bao bohole ba etetseng mokete wa boprapedi, ba ne ba nahana hobane ba faladitse mahlanya wohle. Esale ba qetela ho utlwa ka bona matsatsi a leshome a fetileng. Hang-hang, jwalo ka sehlaha sa dinotshi, ba betseha ka hodima mohaho, ho tswela diterateng, ba hweletsa mme ba itshwere ka-hore-le-ka-hore.

⁸⁸ “Hona ke’ng? Ho na ho bolela’ng? Na banna bana bohole ba tahilwe?”

⁸⁹ Hlokamelang! Mme moporofeta a ema hara bona, ka moo ho lokelang moporofeta kateng, mme a re, “Lona banna ba

Iseraele, le lona ba ahileng Judea, Jerusalema, ho ke ho tsejwe ke lona, mme le utlwe dipolelo tsa ka. Batho bana ha ba tahwa jwalo kaha le lekanya ka bona. Empa hona ke hwane ho boletsweng ke Morena ka Joele, moporofeta, ‘Mehleng ya qetelo, Ke tla tshela nama yohle ka Moya wa Ka.’’ Kgohedi e ne e le eo.

⁹⁰ Batho ba borapedi, ka mora ho thakgisa Kgosana ya Bophelo, le ntho yohle, ba ntse ba sa bone tshepiso ya ho tla ha Moya o Halalelang. Kgohedi “Enwa ke Mang? Hona ho bolela’ng? Bothata ba batho bana ke bofe?”

⁹¹ Oh, kgidi! Ho a tshwana le kajeno. Re tla feta boholo ba ntho ena mohwalotso ho e theolela horeng ena. Ho etsahala ntho e tshwanang kajeno. Ho hlaha ntho e tshwanang kajeno. Ho ntse ho botswa potso e tshwanang. “Malatadiana ana wohlke a eng?” Le ke le shebe hodimo-le-tlase seterateng, makoloi a tswang Michigan ho ya fihla Florida, ho tloha Maine ho ya fihla California. Hoseng hona ha ke tswa ke kganna, kapa ka mora mpa ya motshehare, re ne re theosa ka seterata, nna le mosadi re shebile dilaksense tsa makoloi. Ke hona moo ke nahanneng ka theron ena.

“Hona ho bolela’ng?”

⁹² Jwalo kaha E boletse, “Moo Setopo se leng teng, dintsu di tla bokana teng.”

⁹³ Ka re ho mosadi wa ka, “Moratuwa, o sa hopola bosiu ba maobane ha ke ne ke lokela ho sadisa ntho eohle eo ke e ratang lefatsheng, le ho kena masimong ho qala seo Modimo a itseng se etswe? O ile wa bina pina eo.”

Oh, ba tswa Bochabela le Bophirima,
 Ba tswa mafatsheng a hole,
 Ho keteka le Morena’ rona, ho ja e le baeti ba
 Hae;
 Ba lehlo’nolo hakakang baeti bana!
 Ba bohang ’fahleho sa Hae se tlottlehang
 Se bekenya ke ’rato le Mokgethwa;
 Majalefa a mohau wa Hae,
 Jwalo ka mahakwe moqhakeng wa Hae.

⁹⁴ Ke seo kgohedi e leng sona. Peo ya Modimo e reretsweng pele e ke keng ya etsa letho haese ho Le latela, le molemo ho feta bophelo ho rona. Falatsang maphelo a rona, empa le se ke la falatsa Hono. Kgohedi ke ya’ng? Modimo, ka tlwaelo, o phetha Lentswe la Wona. O boela a phetha Lentswe la Sakaria, la moporofeta Sakaria.

⁹⁵ Hona moo ke badileng teng temaneng ya 9 nakwana e fetileng, mohla Jesu a kenang tempeleng ya Hae, a kaletse... kapa a kena Jerusalema, a kaletse eselana, e tshweu, ho ne ho phethilwe seporofeto sena seo Sakaria a se buileng.

Ke Sena, "Nyakallang haholo, lona baradi ba Sione. Hlabang ditlatse, lona baradi ba Jerusalema. Bonang, Morena wa lona o tla ho lona; O lokile, mme o na le poloko; o ikokobeditse, o kaletse esele, mme o hodima eselana petsana ya esele." Ke seo kgohedi e ne e le sona Jerusalema, hona mono ntlokgolo ya borapedi.

⁹⁶ Jwale re bona ketsahalo ya letsatsi la qetelo! Ha re phetleng maqephe a mmalwa pejana, ho Sakaria, mme re bone seo a se buileng ka yona. Ha re phetleng matsatsing a qetelo. Moo e ne e le mongwaha o mahareng; jwale ha re phetleng matsatsing a qetelo. Mme le phetle ho Sakaria, kgaolo ya 14, le ho qala ka temana ya 4. Mme mamelang! Mme re tla bala karolo ya Lengolo, ditemana tse ka robang mono o le mong, ho tloha ho 4 ho ya fihla ho 9. Mmamelang ka hloko. Mme Le porofeta ka ho Tla ha Hae, matsatsi a qetelo. Mamelang ka hloko jwale. Hona ke HO RIALO MORENA. Ke Mangolo, Sakaria 14. Le hopola Sakaria 9, seo E se buileng? Mme ha ba ka ba E ellewa. Jwale kajeno ke'ng? Sakaria 14, e buang ka ho Tla ha Hae.

Maoto a hae a tla ema ka letsatsi leo hodima thaba ya Mehlwaare, hape, e pela Jerusalema ka nqa botjhabela, mme thaba ya Mehlwaare e tla petsoha ho qala ka bohare ho isa nqa botjhabela le nqa bophirimela, ho be ho hlahe kgohlo e kgolohadi;... karolo e nngwe ya thaba e tla suthela nqa leboya, e nngwe...nqa borwa.

Le tla baleha ka kgohlo ya dithaba tsa ka; hobane kgohlo ya dithaba tseo e tla fihla e tswa Atsele: le balehe, jwalo ka mehleng eo le balehileng ka baka la tshisinyeho ya lefatshe, mehleng ya Osiase morena wa Juda:...

⁹⁷ Tshisinyeho e nngwe e petsolang lefatshe! Ha eba le batla ho latela Lengolo mona, lemohang temaneng ena ya 5, e re ho petsoha ha Thaba ya Mehlwaare ke ka baka la tshisinyeho ya lefatshe, mme hona ho thasisetswa ke Esaia 29:6 le Tshenolo 16:9. Hantle! Ke eng? Yena moporofeta ya boletseng ho Tla ha Hae la ho qala, o bone ho Tla ha Hae labobedi. Lemohang, "Jwalo ka mehleng ya tshisinyeho ya lefatshe." Le bona seo ditshisinyeho tsa lefatshe di se etsang? Le bona ho bolelwa ha tsona e sa le pele?

...mme JEHOVA Modimo wa lona o tla tla, e ena le bahalaledi ba hae kaofela.

Ka tsatsi leo, (allelua) tsatsi leo, lesedi le tla ba siyo, kapa le kganya ya dinaledi e fifatswe:

Etlaba letsatsi ka...letsatsi le tsejwang ke JEHOVA, le ke ke la eba nyene, kapa bosiu: empa nakong ya mantsiboya, lesedi le tla ba teng. (Oho Modimo!)

⁹⁸ “Lesedi le tla ba teng nakong ya mantsiboya,” moporofeta yena eo. Mme batho ba foufetse! Ke kgohedi ya eng? Ha re baleng ditemana tse ding tse mmalwa.

Ka tsatsi leo, metsi a kollang a tla tswa Jerusalema; karolo e nngwe ya wona e phallele lewatleng la botjhabela, e nngwe...e phallele lewatleng la bophirimela: ho nne ho be jwalo lehlabula...mariha. (Evangedi e a tswa; Mojode le Moditjhaba mmoho.)

JEHOVA etlaba Morena wa...lefatshe lohle: ka tsatsi leo, mme ho be le JEHOVA o tla ba mong, le lebitso la hae le be leng.

Lesedi le tla ba teng nakong ya mantsiboya,
(hantle)

Tsel a yang Kganyeng le tla e fumana ruri;

Lesedi le chabile tseleng ya metsi kajeno,

Le patilwe ka Lebitso le tlotleheng la Jesu.

Bacha le baholo, bakang dibeng tsohle tsa lona,

Ruri Moy'o Halalelang o tla kena ka hare;

Lesedi la mantsiboya le tlide,

Ke nnete Modimo le Kreste ba Bang.

Le bona moo re leng teng?

Ditjhaba di a thothomela, Israele ea phaphama,

Pontsho tseo baporofeta ba di boletseng; (ho reketla hoo ha lefatshe ho Baditjhaba tsatsing la qetelo)

Matsatsi a Baditjhaba a badilwe, ka tsietsi tse phophothang;

Kgutlelang, oh, ba qhalaneng, ha'bo lona.

⁹⁹ Lona ba rahetsweng ka ntle, le ka diareka tse behilweng hodima makoloi a matjha, tswang mono kapele pele lefu le le otla. Modimo o E tiisitse. Ho tla ba jwalo.

¹⁰⁰ Ha re phetlang Lengolong le leng Testamenteng ya Kgale, Malakia kgaolo ya 4, mme re bale kgaolonyana eo ya 4.

...bonang, letsatsi lea tla, le tjhesang jwalo ka mollo wa sebopi; mme baikgohomosi bohole, e,...bole ba etsang bolotsana, ba tla ba jwalo ka matlakala:...

¹⁰¹ Jwale, ena ha se...Eo ke Malakia 3, e ne e le ho tleng la ho qala, jwale ho tla ho latelang ke hona. Esita le Ngaka Scofield mona, ruri ha ke dumellane le yena ka dintlha tsa hae, empa mona o e nepile. “Thomo ya Johanne,” ho Malakia 3; le “ho Tla ha Kreste la bobedi,” le Elia pele ho moo. Ho lokile.

...baikgohomosi bohole ba tla tjheswa, ho bolela JEHOVA wa makgotla, mme ho se hlole ho sala ho bona motso kapa lekala. (Di kae dihele “tse sa Feleng” he?)

Empa ha e le lona ba tshabang lebitso la ka le tla tjhabelwa ke Tsatsi la ho loka le nang le matsholo a poloko, poloko mahlaseding a lona; . . . le tla tswa, le be le thale; jwalo ka manamane a nontshitsweng.

Le tla hatakela ba bolotsana; . . . ba tla ba molora ka tlasa bohato ba maoto a lona tsatsing le tla etswa ke nna, ho bolela JEHOVA wa makgotla.

Hopolang . . . molao wa Moshe mohlanka wa ka, oo ke o laeletseng Baiseraele bohole ka yena Horebe, . . . molao le kahlolo.

102 Ho tla ha Elia ke hona.

Bonang, Ke ya le romela moporofeta Elia . . .

103 Lengolo le qetellang Testamente ya Kgale!

. . . Ke tla romela ho lona moporofeta Elia ho eso ho tle letsatsi leo la JEHOVA le tshabehang:

104 Jwale, eo e ne e ke ke ya eba Johanne. Tjhe. Le a bona, lefatshe ha lea ka la tjeswa mme ba lokileng ba tsamaya hodima ba bolotsana. Le a bona? Tjhe, tjhe.

. . . pele ho letsatsi le leholo le tshabehang la JEHOVA:

O tla busetsa dipelo tsa bontate ho bana ba bona, le dipelo tsa bara ho bontata bona, hore ke se tshohe ke tla ke otla lefatshe ka ho le timeletsa.

105 Lemohang ho tsepama ha Moya o Halalelang, ha O sa ka wa fapanya ho tla ho menahaneng habedi hoo ha Elia. Malakia 3, o itse, “Bonang, Ke roma lenqosa la Ka pel’Ka.” Jesu o ne a botswe ka Johanne; O itse, “Ha le ka e amohela, ke yena eo moporofeta a boletseng ka yena, ‘Ke tla romela lenqosa la Ka pel’Ka.’ Enwa ke Elia ya neng a lokela ho tla.” Malakia 3.

106 Lemohang Lengolo le e hlahisa ka ho tsepama. Hlokomele seo ntho ena . . . ho bontsha . . . bao ba tl Lang ho dumela, bao ba batlang ho bona. Hopolang, Jesu o thola bohareng ba Lengolo, hobane karolo ya lona e ne e phethilwe lekgatheng leo, e setseng e bakeng sa ho Tla ha Hae la bobedi? “Ho bolela ngwaha o molemo wa Morena, ho tlamella ba robehileng dipelo,” le ho thola; e seng “ho tlisa kahlolo hodima Baditjhaba” ho fihlela ho Tleng ha Hae la bobedi.

107 Le lemohe Lengolo lena mona le bapa le lane. “Mme yena, Elila, o tla busetsa dipelo tsa bontate ho bana.” (Jwale ho buuwa ka Malakia 4, e seng ho le ferekanya, kapa Malakia 3.) Johanne, Elia, ya tlileng mehleng ya pele ho ho fihla ha Kreste la ho qala, o buseditse dipelo tsa bontate ba bapatriareka ba kgale molaetseng wa bana, molaetsa o motjha.

108 Jwale le hlokomele. “Le dipelo tsa bana ho bontate.” Ho tleng ha hae la bobedi, matsatsing a qetelo, o boela a busetsa morao Tumelong ya baapostola. Le bona ka moo Mangolo a bapang ka phethahalo kateng?

¹⁰⁹ Moo e ne e le pheletsong ya Testamente ya Kgale, Testamente ya Kgale. Jwale rea bona hore Lesedi le teng nakong ya mantsiboya. Ke eng? Ke hloro, Thaba Hloro-ya-sefate.

¹¹⁰ Jwalo kaha ke boletse hoseng hona, re fetile diphuthehong tsa bodumedi, ho feta (e seng sefateng sa lamunu) jwalo kaha ke buile ka sona hoseng hona, empa re ile ra fumana pomelo, lamunu e bodila, mefuta ya dintho tse ding tsohle tse neng di sa tshwane le tshimoloho ho hang. Empa ka mora... Le se ke la E fosa. Ke Ena e tla. Hoba diphutheho tsa mokgatlo di fete, di ne di se na Lesedi le ho qaleng, ho tla ba le letsatsi le ke keng la bitswa motsheare kapa bosiu.

¹¹¹ Ba etsa'ng? Ba etsa'ng? Lemone e—e etsang sefateng sa lamunu? E nka bophelo ba mantla ba lamunu bo nyolohang mme e bo kgopamise ka lemone e bodila. Ke seo diphutheho tsa mekgatlo di se entseng Lentsweng la Modimo, tsa fokodisa Lentswe la Modimo ka meetlo ya tsona. Hoo ke HO RIALO MOYA WA MORENA. Di hlahisitse lemone e bodila, pomelo, e seng dilamunu.

¹¹² Empa moporofeta o itseng? Yena ya bueletseng theroy a rona bosiung bona, “Nyakallang, baradi ba Jerusalema, hlabang ditlatse, baradi ba Sione, hobane Morena wa lona o tla ho lona, a le bonolo mme o ithobile, o kaletse petsana ya eseles,” lemohang yena moporofeta eo o itse, “Nako ya ho butswa e tla fihla.” Letsatsi le romelwa hodima lefatshe ho butswisa tholwana. Hobaneng e sa kgona ho butswa? Ha ho tholwana e ka butswiswang mono. Empa Bophelo bo ntse bo tswela pele.

¹¹³ Bo fetile ka hara pomelo, ho ba lamunu, ba fumana hore e hlophosisitse; e ne e le pomelo. Ba boela ba tsamaya, ba hlaho mohlang oo e le lamunu e bodila. Ba boela ba tsamaya, ba fetoha ntho e nngwe e sele. Mme qetellong, hlorong ya sefate, ba fetoha tanjelo, e leng motswako wa lamunu, motswako wa lamunu e bodila; sehlahiswa se tswakilweng, nthoe kgopamisitsweng; ho fetoha kgopamiso, e phela ka sefate seo; lekgapetla, “le ka thetsang Bakgethwa.” E tshwana le le lamunu, empa ha se yona.

¹¹⁴ “Empa Lesedi le tla ba teng,” ha se hola se fetela ka nqane ho mokgatlo. Ha se feta mokgatlo, se boela se thunya, se tla hlahisa dilamunu jwalo ka mohla se kenang mobung, mme Lesedi le tla tjhaba.

¹¹⁵ Ke kgohedi ya eng ena; sena se etsahalang ke'ng? Ho phethahatswa Lentswe la Modimo. Ke tseo dipaki tse pedi tsa Testamente ya Kgale, hore hona ho tla etsahala.

¹¹⁶ Ha re nkeng Johanne 14:12, ya Testamente e Ntjha, Jesu o boletse.

... Ya dumelang ho nna, mesebetsi eo ke e etsang o
tla e etsa le yena...

¹¹⁷ Hape, ho Luka 17:22 ho fihla ho 30, O boletse.

Jwalo ka mehleng ya Lota, pele ho Sodoma, e tjheswa, ho tla ba jwalo ho kgutleng ha Mora motho, *tsatsi leo mohla Mora motho a ntseng a senolwang.*

¹¹⁸ Oh, shebang Mangolo feela! “Mora motho,” Jesu Kreste yena maobane, kajeno, le ka ho sa feleng, ho hola ho feta mekgatlo, ho hola ho fihlela hlorong ya Sefate. O itseng ho Johanne 14, kapa 15? “Lekala le leng le le leng le ho Nna, le sa beheng tholwana, le tla rengwa le hlaolwe, le lahlelwae mollong le tjheswe. Empa lekala le leng le le leng le behang tholwana, le tla hlwekiswa.”

¹¹⁹ Oh, ruri ho tla fihla pula ya makgonthe ya selemo le ya hwetla matsatsing a qetelo hodima seholotshwana seo se tlang le Yena hodima eselana ena, e ithobileng le e ikokobetsang, ho se ton... kapa phutheho ya mokgatlo, ho hweletsa, “Hosanna ho Kgosi e tlang ka Lebitso la Morena!” Molato ke’ng kajeno? Kgohedi ke ya’ng hodima thaba?

¹²⁰ Ha se kgale haholo, ha ke eme sefaleng sena, ha thwe ke Moya o Halalelang, “Ho tla fihla letsatsi mohla ba kgokgothelang thupa ka pela ntlo ya hao; ba tla suthisa heke ya hao. Ka hoo, seo, o iphapanye, o se ke wa halefa.” Ka bona heke ya ka e fothotswe mme e lahletswe mosikong wa leralla. Ka bona leralla ka pela ka, e epolotswe, matlapa le dintho di robetse mono moo ntho e ne e di silakantse. A re...

Ka sheba, mme ho e-na le Ricky-nyana ya ileng a nyolohela mono mme a thula heke a e hlanamisitse, a entse ketso ena. Ka re, “Hobaneng o sa mpolella hona?” A ka a ntlhalefela, mme ka lokela ho mo otla. Mme ha ke etsa jwalo, ka re, “Ha ke eso etse ntho ena esale ke tswa lesakaneng la ditebele, empa ke batla hore o tsebe,” mme ka mo otla ka se le seng. Mme ha ke mo dihela fatshe, ka boela ka mo phahamisa mme ka boela ka mo lahla. Ka mo phahamisa, makgetlo a mararo kapa a mane, yaba ke mo rahela hodima leralla kwana. Ka hoo ka ya mono, mme ka re, “Ha se hantle.” Mme ka mo phahamisa ka tsukutla matsoho a hae, ka re, “Ha ke a o halefela, empa ke batla feela o tsebe hore o ke ke wa bua jwalo le nna.”

Mme eitse ha ke reteleha ke kgutla, Moya o Halalelang o ne o eme hekeng mono, ho re, “Jwale o iphapanye sena. Mohla ba kgokgothelang thupa eo, leba nqa bophirima.”

Buka ena, sohle seo ke se hlokang,
Buka ena ke Taelo e molemo,
Tsela e bontshang ho potoloha mathata a ka.
Amen!

¹²¹ Mme Buka eo ke Lentswe, mme Lentswe leo ke Modimo. Kwekwetla mathata a hao, Le tla o bolella hore o etse’ng.

¹²² Ke utlwile motswalle wa ka dilemo tse tharo tse fetileng, mohlahlobi wa motse, o dula ka tlasana ho nna, o ile a tsetela thupa. Ka tswela mono ka re, “Molato ke’ng, Mud?” Mora wa Mongh. King, motswalle wa ka.

Ho re, “Billy, ba tlil’o atolosa tsela ena.”

¹²³ Bohle le a hopola. Ka re, “E ka nna ya ba borogo.” Ka bolella Moena Woods, ka re, “Baballa setsha sa hao. Mohlomong borogo boo bo tla feta le hodimo mona, ntho e nngwe.” Seterata se ne se phatlotswe; ditene, majwe, di lahletswe hodima ntho yohle. Ka hoo a re...Ka re, “Baballa setsha sa hao.” Eitse ha ke...

Mongh. King a mpolella hore ke yona ntho e tla etsahala.

¹²⁴ Ka kena, ka re ho mosadi wa ka ya dutseng mane, “Moratuwa, ho na le ntho e ngotsweng ka seo. Ke HO RIALO MORENA, kae-kae.”

¹²⁵ Ka kena ka nka buka ya ka, ka e sheba, mme ya re, “Ho tla etsahala hore...” Dilemo tse robedi ha morao!

¹²⁶ Eitse ha ke sheba, ka re, “Ke nako jwale, Moratuwa, eka kgona re lebe bophirima.”

¹²⁷ Matsatsi a mabedi ka mora moo, ke sa ntse ke eme ka phaposing ekaba hora ya leshome hoseng ho hong, ka kena Moyeng wa Modimo. Ka bona senkgome seo sa maeba a fofang, ka sheba dinonyana tseo. Le a e hopola. Ka bona Mangeloi a supileng ka seboleho sa piramite, a tla ka potlako ho nna. Ho re, “Leba bophirimela, e ya Tucson, o be dimaele tse mashome a mane leboya botjhabela. Mme o tla be o hlotha hlabahlabane,” kapa hloho-tsa-poho, ba e bitsa jwalo mono, “diaparong tsa hao.”

¹²⁸ Moena Fred Sothmann, ya dutseng mono a ntjhebile hona jwale, a le teng mono hoseng hoo. Ke se ke lebetse ka yona.

¹²⁹ Ka re, “Ho phatloha ho qhomeng jwalo ka ho reketla ha lefatshe, ho batlie ho sisinya ntho yohle naheng. Ha ke bone ka moo motho a ka e phonyohang.” Ke ne ke tshohile. Ka ema Phoenix, lona bohole ba mametseng bosius bona le mpakele. Ka rera ka thero, *Benghadi, Ke Nako Efe?* “Re ho kae?” Ka ya Bophirima. Bongata ba lona mona le na le teipi eo, bongata ba lona mona le utlwile ha e bolelwa, selemo kapa ho feta pele e etsahala.

¹³⁰ Ka ya Bophirima, ke ipotsa se tla etsahala. Ka tsatsi le leng ka fumana pitso e tswang ho Morena. Ka bolella mosadi wa ka, ka re, “Moratuwa, ke...mohlomong mosebetsi wa rona o fedile.” Ke ne ke sa tsebe. Ka re, “Ke...Modimo, mohlomong Modimo o qetile ka nna jwale mme ke tla ya Hae. O ikopanye le Billy, o nke bana. Modimo o tla le etsetsa tsela, ka mokgwa o itseng. Tswela pele o phelele Modimo ka botshepehi. O hlokomele bana ba qete sekolong, o ba hodisetse tshabong ya Modimo.”

A re, "Bill, ha o—ha o tsebe hore ke nnete."

Ka re, "Tjhe. Empa motho o ne a sa tl'o phonyoha ntho eo."

¹³¹ Hoseng ho hong Morena a ntsosa, ho re, "Nyolohela kwana Kgohleng ya Sabino." Ka nka pampitshana le Bibele ya ka.

Mosadi a re, "O ya kae?"

Ka re, "Ha ke tsebe. Ke tla o bolella mohla ke kgutlang."

¹³² Ka nyoloha ka kgohleng, ka nyolohela hodimo moo dintsu di fofang teng. Ke ntse ke shebile dikgama tse mmalwa tse emeng mono. Ka kgumama fatshe ho rapela, mme ka phahamisa matsoho a ka, yaba Sabole e otla letsoho la ka. Ka qamaka. Ka nahana, "Ke'ng? Ha kea ferekana. Sabole eo ke ena ka hara letsoho la ka; e phatsimang, e kganyang, e benyang letsatsing." Ka re, "Jwale, ha ho batho dimaele tse ngata ho tloha ho nna, hodimo-dimo kgohleng ena. Ntho eo e ne e tswa kae?"

Ka utlwa Lentswe, le re, "Eo ke Sabole ya Morena."

Ka re, "Morena o ye a hlomele monna ka sabole."

¹³³ Yena, Lentswe, la kgutla, la re, "E seng sabole ya morena feela, empa, 'Sabole ya yena Morena,' Lentswe la Morena." Ho re, "O se ke wa tshoha. E mpa e le Kgulo ya Boraro. Ke netefatso ya tshebeletso ya hao ya lentswe."

¹³⁴ Ke ne ke il'o tsoma le motswalle, ke sa tsebe se tla etsahala.

Mme motho a mpitsa, yena ya ntshomileng ka sethswantsho sa Lengeloi la Morena, yena ya se katladitseng. Ke ne ke lokela ho ya Houston ka baka la mora wa hae, hoba a ne a ahloletswe lefu mme a tla bolawa matsatsing a mmalwa. Mme a kopana le nna le ho potisa matsoho a hae a nkopela, ho re, "Ak'o nahane, yena monna eo ke mo nyatsitseng o tlie ho pholosa mora wa ka ya mong!" Mokgatlo wa setjhaba o bile wa nkabela seo ba se bitsang kgau, kapa e leng hore le e bitsa'ng, ka baka la ho pholosa bophelo.

¹³⁵ Yaba re kgutlela morao, ka nyolohela thabeng ho ya tsoma. Mono, nna le Moena Fred, hoseng ho hong ha ke tswa, mme ke—ke se ke fumane kolobe yaka ya javelina, yaba kea sheba mme ka bona moo di ileng teng. Ka re, "Moena Fred, o nyolohela thabeng yane hoseng ka matjeke jwale, ho se ho batla ho ela, mme nna ke tla nyoloha le ka nqa e nngwe. Ha ke n'o thunya kolobe eo, ha ke n'o e bolaya. Empa ha di hlaha ka mona, mohlape oo, ke tla thunya ka pel'a tsona ke di kgutlisetse morao."

¹³⁶ Moena Fred a tswela mono mme ke ha ho se na dikolobe. A ntsokela letsoho mme ka bona. Ka theoha ka kena kgohleng, mafarung a matonana, letsatsi le ne le tjhaba. Ka pota ka lehlakoreng le leng la leralla, ke sa nahane letho ka diporofeto. Ka dula fatshe, ke lebeletse, ke phomotse; ka nahana, "Ho etsahets'eng ka dikolobe tseo?"

¹³⁷ Ka phahamisa...Ka dula fatshe jwalo ka ha maIndia a etsa, le a tseba, ke fapantse maoto. Ka sheba leoto la ofarolo ya ka, mme ho ena le hloho-tsa-poho [hlabahlabane—Moft]. Ka e hlomola. Mme ka re, “Ho a makatsa! Ke nna enwa, dimaele tse ka bang mashome a mane leboya botjhabela ho Tucson. Moshanyana wa ka Joseph o dutse mono o nkemetse.” Mme ha ke qala ke sheba, ka bona mohlape wa dikolobe o hlaha dijarete tse ka bang sekete ho tloha ho nna, hodimo thabeng, ka lahlela hloho-tsa-poho fatshe. Ka re, “Ke tla di fumana. Ke tla lata Moena Fred, mme ke tla fanyeza pampitshana ho hlokomedisa hore a ye ka tsela efe, mona ocotillo-ng ena, mme re tla lata Moena Fred.”

¹³⁸ Mme ka nyoloha thaba, ke matha haholo kamoo nka kgonang ka lehlakoreng lane. Hang-hang, ka nahana hore motho o nthuntse. Ke ne ke eso utlwe ho qhoma ho ho kaalo; ha sisinya na ha yohle. Mme, hoba ho etsahale jwalo, ke ha ho eme ka pel'a Mangeloi a supileng ka senkgome.

¹³⁹ Ka kopana le Moena Fred le bao, ha moraonyana. Ha thwe, “E ne e le eng?”

Ka re, “E ne e le yona.”

“O tlil'o etsa'ng?”

¹⁴⁰ “Kgutlela hae. Hoba HO RIALO MORENA, diphiri tse supileng tseo esale di patwa ka hara Bibele dilemo tsena tsohle, diphutheho tsena tsa mekgatlo le ntho yohle, Modimo o tlil'o re kwahollela diphiri tseo tse supileng Ditiiso tse Supileng.”

¹⁴¹ Ho ne ho ena le sedikadikwe seo se nyolohang lefatsheng, eka mohodi o ipopang. Ha O etsa jwalo, Wa nyolohela kwana thabeng, wa qalella ho dikoloha ho ya bophirima, ho tloha moo O tswang teng. Mahlale a O fumana ka mora nakwana, bophahamo ba dimaele tse mshome a mararo le dimaele tse mashome a mabedi le metso e mehlano ka bophara, hantle feela e le sedikwadikwe sa piramide.

¹⁴² Mme tsatsi le leng, ha ke eme mono, ka phikolosetsa setshwantsho ho le letona, mme Jesu ke eo ka moo A ne a le kateng ho Mengwaha e Supileng ya Kereke, ka wiki e tshweu, ho bontsha boModimo bo Phahameng. Ke Alfa le Omega; ke Wa Pele le Wa Morao; ke Yena Moahlodi ya Phahameng wa Bosafeleng bohole, a eme mono, ho tiisa Molaetsa wa hora ena. Mme Lesedi le tla ba teng nakong ya mantsiboya! Ho etsahala'ng? E ne e le eng?

¹⁴³ Ka ya bophirima. Hodim'a yona thaba eo, ha re feta le Moena Banks Woods mono, ha thwe, “Lahlela lejwe hodimo. E re ho Mongh. Woods, ‘HO RIALO MORENA, o tla bona Kganya ya Modimo.’”

¹⁴⁴ Hona tsatsi le lhahlamang, ha ke eme mono, setsokotsane sa theoha sa phatlola dithaba. Mafika a kgaola dihloro tsa

difate, maoto a ka bang mararo kapa a mane ka hodim'a hloho yaka. Sa phatloha hararo, mme baena ba tla ba matha. Ho ena le banna ba ka bang leshome le metso e mehlano ba emeng mono, bareri le ntho yohle. "E ne e le eng?" A re, "E ne e le eng?"

Ka re, "Kahlolo e otla Lebopo la Bophirima."

¹⁴⁵ Matsatsi a ka bang mabedi ka mora moo, ho reketla ha lefatshe ha batla ho hohlometsa Alaska. Ke Lesedi la'ng lena hodima Thaba ya Sunset Morung wa Coronado wa Arizona? Ntho e hlollang ena e hlahileng hodimo mono ke eng, eo esale batho ba kganna ka baka la yona ba ya botjhabela ba tswa bophirima, ba ntse ba thonaka majwe a robetseng moo Se ottileng? Mme le leng le le leng la wona, lejwe ka leng, le ena le ntlha tse tharo, tse betlilweng ke Sona. (Boraro bona bo Bong.) A robetse hodim'a ditafole, hodima ditekanyo tsa dipampiri, naha ka bophara. Ntho e hlollang ena hodim'a Thaba ya Sunset Morung wa Coronado ke eng?

¹⁴⁶ Junior Jackson o mametse, le sa hopola toro a e lorileng eo ke e hlalositseng, "ho ya nqa bodikela letsatsi"? Mme hona ho etsahetse hodim'a Thaba ya "Sunset." Ke nako ya mantsiboya, nako ya bodikela letsatsi. Molaetsa wa bodikela letsatsi, histori e felang, seporofeto se felang, ke rialo, se a phethahatswa. Mme Lesedi le tla ba teng nakong ya mantsiboya, hodima Thaba ya Sunset Morung wa Coronado, dimaele tse mashome a mane leboya ho Tucson. Nkang mmapa mme le bone hore ha se Hloro ya Sunset e mono. Ke hona moo e etsahetseng hantle. Ke ne ke sa e tsebe ho fihlela ka tsatsi le leng.

¹⁴⁷ Ntho yohle e . . . E ke ke ya shwa. E ntse e Iphutholla e sa phetse. Ho tloha ha ntho eo e etsahala, ho ya setshwantshong seo e leng Jesu ya neng a re shebile; mme jwale hantle hodim'a Thaba ya Sunset, mme Lesedi la bodikela letsatsi. Lesedi la mantsiboya le tlie, Modimo o a Inetefatsa. Ke eng? Ke dinnete tsa hobane Modimo le Kreste ba bang. "Bosweu," ba bakae ba bo boneng, wiki e tshweu hodim'a Hae, jwalo ka ha re buile ho Tshenolo 1? Le a bona, BoModimo bo Phahameng, Boholo bo Phahameng; ha ho lenswe le leng, ha ho modimo o mong, ha ho ntho e nngwe e sele! "Botlalo ba BoModimo bo ikahetse ho Yena ka mmеле." Mangelo ka BoWona e ne e le wiki ya Hae. Amen.

¹⁴⁸ Ho etsahetse'ng hodim'a Thaba ya Sunset? Modimo o tiisa Lentswe la Wona. Ke sona seo lerata lena lohle le se bolelang. Lemohang, ke Modimo ya boelang a phetha Lentswe la Wona la tshepiso, la Ditshenolo 10:1 ho fihla ho 7, "Mme mehleng ya ho utlwahatswa ha Molaetsa wa lengeloi la bosupa, sephiri sa Modimo se tla be se phethhilwe." Sephiri se patilweng sa Ditshenolo 10:1ho ya ho 7, Molaetsa wa ho qetela ho mongwaha wa kereke ya ho qetela. Ho phethahatsa hantle mongwaheng ona, Mohalaledi Luka 17:30, "Ka letsatsi leo Mora motho a tla senolwa ka lona."

¹⁴⁹ “Mme ho tla hlaha baporofeta ba bohata le bo-Kreste ba bohata, ho bontsha mehlolo e meholo le meeka, hoo e ka thetsang le Bakgethwa ha ho ka etswa.” Batho ba sa ntse ba belaela. Mme, ka tlwaelo, kereke le yona e maketse hakaalo.

¹⁵⁰ Mme mahlale, hohle Tucson le hona jwale, ba ntse ba ngola diratswana mme ba di kenya pampiring. Morao kwana Thabeng Lemmon, dikhamera tse kgolo tseo ha dia Le bona le phahama moo re ne re eme teng; le fofela nqa Bophirima, ho bontsha hobane nako e fedile. Le ka tsamaya ha nyenyane feela ho fihla moo; le Lebopong la Bophirima. Kahlolo e sa tswa otla hantle, moo le ileng teng. Ho feta hantle hodim'a Phoenix le ho tshela hantle, ho ya Prescott le ho haola dithaba ho ya Lebopong le Bophirima, ho ya hantle ho kena... A ne a ya kae? Hantle hodimo kwana ho kena Alaska, mme ya thwathwaretsa, e ntse e lebile nqa eo.

¹⁵¹ Mme dibaka tsa bohlahlobi le bohole Tucson ba ntse ba botsa, diphuputso tsa mahlale di leka ho fumana hore ke eng. Le phahame hoo e ke keng ya eba mouwane, mohudi, kapa letho hodimo mono. “Le entswe ke eng? Le ho kae?” Ba makaditswe ke Sedikadikwe se mohlolo se lepeletseng kwana lehodimong jwalo ka mohla Balepi ba tlang ba latetse Naledi, ba re, “O kae ya tswetsweng Morena wa Bajuda?” E ne e le eng? Modimo o ne a phetha Lentswe la Wona, “Mme naledi e tla tswa ho Jakobo.”

¹⁵² Mme Modimo wa Lehodimo o tshepisitse hore nako ya mantsiboya e tla ba le Masedi a mantsiboya. Dilemong tse tharo tse fetileng sephiri sena e ne e le boporofeta, “Ke nako efe, Monghadi?” Empa jwale ke histori. Se fedile. Tshepiso e phethilwe. Ke nako efe, monghadi, mme ke kgohedi ya eng ena? Modimo o phethahatsa Lentswe la Wona! Ke Yena maobane, kajeno, le ka ho sa feleng.

Ha re rapeleng.

¹⁵³ Modimo o ratehang, ke tshwareletse batho halelele, halelele ho feta ka moo ke ne ke lekantse. Ke a rapela, Modimo, hore ebe ho builwe kapa ho entswe ntho e tla bula kutlwisiso ya batho ba ka ntle hohle. Mme ka ho bona le ho utlwisia ba tle ba dumele hore O Kreste wa nnete, le hobane Mantswe a tiiswang ke thasisetso ya Lentswe la Hae le phethahetseng le le tlatswang sehleng sa Lona.

¹⁵⁴ Jwale, Morena Jesu, ho latela Mantswe a Hao ka Sebele, O itse, lefatshe le tla ba maemong a Sodoma. Re tseba seo, re ka se sheba. Mme O itse, ka tsatsi leo, “Jwalo ka ho etsahetse Sodoma.” Ho bile le barongwa ba bararo ba rometsweng lefatsheng la Baditjhaba le la Baheberu. Mme e mong wa bona, e leng Modimo ka BoYena, Mora motho, a Itschenola ka sebopheho sa motho le ho etsa mohlolo, hoo ho bileng ha bolellwa Abrahama seo Sara a na a se etsa ka mora Hae ka tenteng.

¹⁵⁵ O itse e tla boela e ipheta mohla lefatshe lohle la Baditjhaba le tla be le le maemong a Sodoma. Mme re mona, Morena. Diporofeto tse ding di tiisa ntho yona eo, ya ho romelwa ha Elia matsatsing a bofelo, Moya wa Elia hodim'a lefatshe, ho tlisa dipelo tsa bontate, kapa, "bana morao ho bontate." Mme ke a rapela, Modimo, hora ena ebe eo O tla tiisa Lentswe la Hao ka yona, hore esale Wena maobane, kajeno, le ka ho sa feleng. Fana ka sena, Ntate. Ke ba Hao bohle. Ke rapela hore O abe mahlohonolo ana le ho tiisa se builweng, bakeng sa Kganya ya Modimo. Ka Lebitso la Jesu Kreste. Amen.

¹⁵⁶ Ho bua lentswe, ho nka motho; ho tiisa lentswe, ho nka Modimo. Ho bua ntho, ke taba e nngwe; hore Modimo a e etse, ke ntho e nngwe. Modimo ha o hloke toloko ya letho; O Itolokela ka Sebele sa Hae.

¹⁵⁷ Jwale re itokisetsa ho tshwarana le mola wa thapelo, ho rapella ba kulang, ha Modimo a rata. Mme rea tseba ha ho lea mong, ha ho monna, ha ho mosadi, ha ho motho, ha ho lengeloi, le ka o foidisang, hoba Modimo o se a entse hoo. O se a entse tlhophiso, ntho e le nngwe eo o lokelang ho e etsa ke ho e amohela.

¹⁵⁸ Ha ho motho, ha ho lengeloi, ha ho letho, esita le Modimo ka BoYena, ya ka o tshwarelang dibe tsa hao. Ntho eo e se e entswe. Jesu o entse hoo Sefapanong. Empa ho ke ke ha o atlehisa ka letho, kapa ntho efe feela, kapa ho o tswela molemo wa letho, pele o e amohela. O a bona?

¹⁵⁹ Ntho e le nngwe e ka etswang, ke ditaelo tse ntshitsweng ke Modimo, hore badumedi ba behe matsoho hodim'a ba kulang. Esale ba etsa hoo le mengwaheng, ditsoseletsong. Mme ba e bitsitse, "Modimo."

¹⁶⁰ Abrahama o bone dipontsho tse ngata. Empa ha fihla mohla Abrahama a boneng pontsho ya hae ya ho qetela, pejana Sodoma e tjheswa, mme e le Modimo a Iponahatsa ka sebopheho sa motho. Na le dumela seo? Na Jesu o itse e tla boela e ipheta?

¹⁶¹ Jwale, ba bakae mona . . . Le ka ntle seyalemoyeng, kapa ka ntle difonofonong naheng ka bophara, ha eba le ntse le mametse, itokisetseng thapelo jwale, dulang thapelang, le lona ba behileng disakatuku tsena mona. Jwale, nke ke ka bolella Modimo a etse'ng. Tjhe, ke mpe ke se ke ka leka ho etsa hoo. O ikemetse; O etsa see A se batlang. Nka mamela feela le ho bua feela see A se buang.

¹⁶² Mme jwale ba eme pel'a mabota, ba hatellane ka hare, ho petetsane. Kea ipotsa na re ka botsa Modimo ka mantswe ana, "Ke kgohedi ya eng ena?" Ha Modimo a ka boela a tsamaya hara rona (kaha mohlomong baeti ba le teng), le ho tsamaya hara rona le ho bontsha sefahleho sa Hae se bokwang hara rona, ho bontsha hobane Moya wa Hae o teng mona, ho bontsha hobane ke Yena

maobane, kajeno, le ka ho sa feleng, hore e mong le e mong wa rona (ka mora Melaetsa ena e mmedi e thata) a tle a dumele hore ho jwalo? Na le ka etsa jwalo? Ho lokile.

¹⁶³ Ho ena le ho bitsa mola wa thapelo, he; ho a tjhesa, ho petetsane, ba eme leboteng. Ha ke sheba *ka* mona, ho bitsa mola wa ka wa thapelo, o ke ke wa kgona; shebang, le eme mono. Na nka o bitsa *ka* mona? Bakudi ba lona, mealo, ntho yohle, ho robetswe; o ke ke wa kgona. Ka hona dula moo o leng teng, mme o dumele ho Modimo. Ha o na le karete ya thapelo, e tshware, e tla ba ntho e ntle. Re tla fihla ho wena ha o batla ho feta moleng. Empa ha oa tlameha ho feta moleng.

¹⁶⁴ Mongh. Shepherd eo, bosiu ba Sontaha se fetileng, ha a ka a feta moleng wa letho. Ha ke—ha ke kgolwe a ne a nkile karete ya thapelo. Na Mongh. Shepherd o teng bosiung bona? O kae? Na o teng? O ka morao. Na o ne o nkile karete ya thapelo, Mongh. Shepherd? O ne o se na yona? O ne se na yona. O dutse hona mono hape, bosiung bona. Seo ke sebaka se setle ho ba ho sona, Moena Shepherd.

¹⁶⁵ Ha o a lokela ho ba mono feela, empa e ba le tumelo. Hobane, hopola, mosadi e monyenyanne o ne a ame kobo ya Hae mme A e utlwa. Mme ke Yena maobane, kajeno, le ka ho sa feleng. Mme lengolo la Baheberu, Testamenteng e Ntjha, le itse, Ke Moprista e Moholo bosiung bona ya ka “angwang ke maikutlo a mefokolo ya lona.” Na le dumela seo? E bang le tumelo ke hona! Le se E belaele. Dumela ho Yona, mme e tla etsahala. Le fumana seo le—seo le se kopang, ha le ka E dumela. Empa eka kgona le E dumele. Na le tla etsa hoo? Le tla E dumela bohole? Ke ba bakae ba tla E dumela jwale? Modimo a le hlohonolofatse.

¹⁶⁶ Ha ke tsebe hore mang ke mang. Ha ke tsebe le ya mong wa lona. Ha se tshwanelo ya ka ho tseba mang feela wa lona. Ke tshwanelo ya Modimo ho tseba dintho tsena. Empa O tla e etsa ha le ka E dumela. Le tla E dumela jwale?

¹⁶⁷ Jwale, Modimo o Ratehang, ruri ha re sekga kgatha sa Bakreste ba futswetsweng, ha rea lokela ho ba jwalo, motho ya neneswang le ya qekiswang. Ha O na mofuta oo, Morena. O na le badumedi ba kgohlahetseng. Bona Boteng ba Modimo bo tukisa pelo ya motho. Jwalo ka Abrahama, o ile a dumela Modimo. Wa na wa Itsebisa yena, yaba O hlaha ho yena le ho etsa pontsho, mme a O dumela. Wa na wa fetolela mmele wa hae ho mohlankana e motjha, mme le mosadi wa hae, etswe, mosadi wa hae e ne e le karolo ya mmele wa hae. Yaba ho hlaha ngwana e motjha, mora wa tshepiso.

¹⁶⁸ Modimo, O tshepisitse hobane ho tla hlaha ntho e tshwanang tsatsing lena. Ke rapela hore O tle o tiise Lentswe lena. Mme re tla sebetsana hantle le tshepiso e le nngwe eo mono, hore ho tla ba jwalo ka Sodoma, pejana feela Sodoma e

tjheswa mme kahlolo e wela Sodoma, lefatshe la Baditjhaba. Ka baka leo kahlolo e itokisetsa ho wela lefatshe la Baditjhaba, mme Bajuda ba na le dilemo tse tharo le halofo nakong ya Matshwenyeho, tlokotsi ya Jakobo, tswelliso ya diveke tse mashome a supileng tsa Daniele. Empa, a Baditjhaba a badilwe, ke nako ya ho falla. Mme O fane ka pontsho eo, mme O itse ho tla ba jwalo hape. Fana ka sena, Modimo. Bao ba, re matsohong a Hao, sebetsa ka rona ka moo O bonang ho loketse kateng. Ka Lebitso la Jesu Kreste. Amen.

¹⁶⁹ Jwale le se ferekane. Ho ne ho tla ba jwang hola ke ferekane? Jwale, mona ke etsa ntho e tla itshetleha boikemelong ba Modimo. Empa hobaneng ke etsa hona? O itse ho tla ba jwalo. Ke phetho. Mme ha A ka Iketsa seo, ho netefatsa jwalo ka pela lona, tjhe, na le ke ke la Mo dumela? Ehlide. Le be le tumelo feela jwale mme le dumele.

E reng ke qamake, ho bona moo Moya o Halalelang o tla ya teng, seo A tla se etsa. Ha ke tsebe seo A tla se etsa, ho ho Yena. Empa ha le ka ba le tumelo feela, ho dumela feela, "Tsohle di etsetswa ba dumelang." Na le dumela seo lona bohole, phahamisang matsoho a lona mme le re, "Ke a E dumela." [Phutheho e re, "Ke a E dumela."—Mong.] Ka pelo yaka yohle, ke a E dumela.

¹⁷⁰ Jwale boraro e tla be e le bopaki, ha eba A ka e etsa ka makgetlo a mararo a latelanang, ho le pakela hore E nepahetse. Ha ke tsotele moo o leng teng, hore o mang, eka kgona o be le tumelo mme o dumele. Jwale, le se ke—le se ke la etsa morusu. *Ka nqa ena.*

¹⁷¹ Mofumahadi ya rapelang, ha ke o tsebe. Dula moo o leng teng feela; ha o a tlameha ho tla. Ha ke o tsebe, empa o nkile ngwananyana letsohong la hao, kapa o mo sikile. Ke molata ho wena ka bottlalo. Mme ngwanana eo o bonahala a se na bothata, o bonahala a phetse. Ke ngwanana e motle, ngwanana ya hloho e kgubetswana. Ke mo shebile mona, ha a bonahale a holofetse ka le letho. Ha ke tsebe se phoso ka yena. E ka nna yaba hase ka baka la ngwana; e ka nna ya ba ka baka la hao. Empa ke o bone feela o dutse mono ka ngwana eo, mme o rapela. Ke loketse ho bua le wena motsotso, ho hokahana le moywa hao, jwalo ka ha Jesu a itse ho mosadi, "Mphe metsi," le a bona, ho tshwantsha—tshwantsha motho a le mong. Moena Bryant le bao ba dutseng mona, ke tseba batho bana ba dutseng mona. E ka nna yaba ba hloka, le bona, empa wena o molata.

¹⁷² O a dumela hore ke moporofeta wa Modimo? Na o dumela dintho tsena tseo o di utlwileng bosiusing bona ke Nnete? Jwale, ha Modimo a ka ntshenolela ntho o e entseng, kapa ntho o no o sa lokela ho e etsa, kapa ntho e phoso ka wena, kapa seo takatso ya hao e leng sona, o tla tseba ha e le nnete kapa tjhe.

Na o ke ke? Mme ha A ka etsa hoo, na e tla paka Lentswe la Hae hore ke Yena maobane, kajeno, le ka ho sa feleng, le hore Mohalaledi Luka 17:30 o ntse a bonahatswa? O a E dumela?

¹⁷³ Jwale, mofumahadi o phahamisitse letsoho la hae ha re tsebane. Ha ke eo tsebe, empa ke leka ho hokahana le moyo wa hae, motho a le mong. Ho na le ba bangata ba lona ba hulang. Jwale, o dumele Sena ka pelo yohle ya hao.

Jwale, ke ka baka la ngwanana. Ha se ka baka la hao. O ferekane, empa ha se ho ferekana ho o tshwenyang. Ntho e kgolo pelong ya hao ke ngwanana eo. Mme na o dumela Modimo a ka mpolella seo e leng sona? O a e dumela? Na e tla o thusa, o ka dumela ke hona? Ke temalo ya boko. Ho jwalo? Jwale bea letsoho la hao hodim'a hloho ya ngwana; letsoho la hao.

¹⁷⁴ Modimo o Ratehang, O boletse, "Mehlolo ena e tla tsamaya le ba dumelang. Ba tla bea matsoho a bona hodima ba kulang, mme ba tla fola." Mosadi eo ke modumedi. Letsoho la hae le hodim'a ngwana. A ke a fole. Ka Lebitso la Jesu Kreste, ke neela thapelo ena. Amen.

¹⁷⁵ Jwale le a dumela, lona bohole? Ha le ka dumela, tsohle di ka etswa. Ehlile!

¹⁷⁶ Ke tseba mofumahadi ya dutseng pel'a hae, empa o shebile ka mona ka botshepehi. Ke lebala lebitso la hae, empa ke... Ha nka mo sheba motsotsotso, ke ne ke tla tseba. Empa ke tseba tshobotsi ya mosadi eo, empa ha ke tsebe bothata ba hao. Na o dumela ke... Modimo o tla ntsebisa bothata ba hao ke bofe? Na o ka... Ho tla o thusa? Lefu la tswekere. Jwale, ha ho nepahetse, phahamisa letsoho la hao. Ehlile!

¹⁷⁷ Ho etsahetse feela hore ebe mofumahadi ya robetseng... ya dutseng pel'a hao, o tshwerwe ke ntho yona eo. Ke molata. Mofumahadi e mong o ntse a rapella motho e mong, ngwana ya holofetseng. O dumele ka pelo yohle ya hao, Modimo o tla o fa yona.

¹⁷⁸ Motho e mong morao mona. Monna ya dutseng hojana kwana, o leka ho tela ho tsuba disakrete. O a dumela Modimo o tla o tedisa tsona? Ho lokile. O a dumela? O ka fumana seo. Ha ke eso ho bone monna eo bophelong ba ka.

¹⁷⁹ Monna ke enwa. Ho bona seriti se lefifi seo se lopaletse hodim'a monna enwa hantle mona ya robetseng moalang, kapa setulong? O a shwa. O leroothong. O na le mofetshe. Ha ke tsebe monna eo, ha ke eso mmone. Modimo o tseba tsohle ka wena. Ke nnete eo, monghadi. Na o dumela Modimo a ka mpolella ho hong ka wena? Na e tla o thusa ho amohela phodiso ya hao? [Moena o re, "E, ke etsa jwalo."—Mong.] O tlisiswe mona ke motswalle. Empa ha o tswe mona, o kae-kae moo ho nang le metsi a mangata moo batho ba tshwasang

dihlapi teng. [“Eya.”] Eya, Albany, Kentucky. [“Ho jwalo.”] Ho jwalo. Dumela, mme o ka kgutlela hae, o fodile. Dumela hore e nyametse. Ha o ka E dumela! O tshwanetse ho E dumela, mme o dumele hoba e etsedsitswe wena. O a dumela?

¹⁸⁰ Wena, o tswa Tennessee, o na le moshanyana ya nang le asma. Ha a yo mona, empa o dumela o tla fodiswa? Nka sakatuku sa hao he, sa hao...letsohong la hao mono, se ise ho yena. O tla fodiswa ha o ka E dumela.

¹⁸¹ Mofumahadi ya llang, ya dutseng ka nqane ho Ngaka Vayle mono. O leroothong, le yena, seriti se lefifi. Ha ke eso ho bone mosadi eo bophelong ba ka, empa o na le mofetshe. O tla shwa ha a sa etsetswe letho. Na o dumela A ka o fodisa, mofumahadi? O ka kgona? O ka amohela phodiso ya hao, ha o ka dumela feela.

¹⁸² Ho na le mofumahatsana ya dutseng ka mora hae hantle a beile sakatuku molomong wa hae. Le yena o na le alska ka mpeng, o a kula. O bile o a akgeha, o foufale, o idibane. Motho e mong o o tlisitse mona. O na le bothata ba bosadi. Ha o ka dumela, o ka ya hae, wa fola.

¹⁸³ Wena, mohlankana, o molata; o dutse hantle mona ka pel'a ka, o ntjhebile. O mo kae, mo Puerto Rico kapa ho hong? Eya, seo ke neng ke se bolela...?...! Ke molata ho wena. O tseba seo; ha o tswe naheng ya habo rona. Empa o a dumela Modimo a ka o fa takatso ya pelo ya hao? Ha nka o bolella seo takatso ya hao e leng sona, na o tla e amohela? O batla kolobetso ya Moya o Halalelang. Ke nnete. Amohela Moya o Halalelang, moena wa ka.

¹⁸⁴ Monna wa bammala ke enwa o dutse motsheo mona, o na le morwalo pelong ya hae. Ke ka baka la mosadi wa hae. Ha a yo mona, e bile. O na le bothata ka maoto a hae. O dumela hore O tla mo fodisa? O etsa jwalo? O moeti mona. O tswa mose ho lewatle. O tswa Jamaica. Na o dumela Modimo a ka mpolella o mang? Mongh. Brady. O a dumela? Jesu Kreste ke yena maobane, kajeno, le ka ho sa feleng.

¹⁸⁵ Mofumahadi enwa ya dutseng morao pheletsong ena, haufi le Mof. Wright mono, o na le morwalo pelong ya hae. O rapella moradi. O tla ya etswa oporeishene. O dumela ka pelo yohle ya hao, bakeng sa hae? A ke ke a e hloka ha o ka etsa hore a E dumele. Nna nke ke ka fodisa.

¹⁸⁶ Morao kwana ka phaposing ya bana, ke bona Moya wa Morena, Lengeloi, Lesedi le tsamaya ka phaposing ya bana. Le hodim'a mosadi e motjha, mme o na le bothata ba moya boo a ipotsang ka bona. Eka ke tlamehile ho tseba mosadi eo, ka mokgwa o itseng, mosadi e motjha. Le yena o na le bothata ba bosadi. E. Lebitso la hae ke Mof. West, ho tswa Alabama, Mof. David West. Dumela; Modimo o tla o fa yona.

¹⁸⁷ “Lesedi le tla ba teng, le ka letsatsi leo Mora motho a tla senolwa ka lona.” Ha eba e se Jesu Kreste maobane, kajeno, le ka ho sa feleng, ha ke tsebe letho ka Yona. Na le dumela Seo? Tsohle di ka etsetswa ba dumelang.

¹⁸⁸ Ka ntle dimaekrofonong naha ka bophara jwale, le ka hara tabernakele ena, ba bakae ba lona ba tla phahamisa matsoho a lona le re, “Ke modumedi”? Jwale, lona ka ntle dinaheng kwana, motho e mong le e mong o phahamisitse letsoho la hae, mona. Le ka ntle kwana, kae-kae ho haola le setjhaba, le phahamisitse matsoho a lona, ntle le pelaelo. Jwale le tutubale, o bee matsoho a hao feela hodim'a motho ya haufi le wena. Tshwara letsoho la hae. Le bee hodim'a lehetla la hae. Ke beile matsoho a ka hodim'a disakatuku. Shebang se entsweng kajeno! Shebang se etswang jwale.

Ba boha 'fahleho sa Hae se tlottlehang
Se bekenya ka lerato le Mokgethwa;
Majalefa a bokwang a mohau wa Hae,
Jwalo ka diperela moqhakeng wa Hae.

Jwale rapelang. Ha re rapeleng, hohle.

¹⁸⁹ Modimo o Ratehang, hora e fihlile. Sena se bolela'ng? Modimo o tlatsa Lentswe la Wona! Ke kgohedi ya eng, Morena? Ke Modimo o tlatsa Lentswe la Wona. Ke'ng hona ho etsahalang naha ka bophara, ka fonofono, ha e le moo batho ba makgolokgolo ba beane matsoho hodimo ho haola le setjhaba, ho tswa lebopong le leng ho ya ho le leng, ho tloha Leboya ho ya Borwa, Botjhabela ho ya Bophirima? Ke mona ho dutse batho mona ho tswa naheng disele, bongata ba dinahamahae, Mexico, Canada, mme re beane matsoho hodimo. Modimo o tlatsa Lentswe la Wona!

¹⁹⁰ Ho tla jwang hore motho a eme mona ka Moya o Halalelang mme a bitse monna jwalo kaha A entse ho Simone Petrose, “Lebitso la hao o Simone, o mora Jona”?

“E-ya lata monna wa hao le tle kwano.”

“Ha ke na monna.”

“Ke nnate. O bile le ba bahlano.”

¹⁹¹ A re, “Kea tseba Messia o tla tla a etsa tsena, empa Wena o Mang?”

A re, “Ke Yena.”

¹⁹² Mme ke Wena maobane, kajeno, le ka ho sa feleng. Mme o tshepisitse, “Mesebetsi eo Ke e etsang le tla e etsa le lona. Le tla etsa le e fetang ena, hoba Ke ya ho Ntate.” “Mme, bonang, mehleng ya bofelo Ke tla le romella Elia, moporofeta, mme o tla fetola menahano ya batho, ho busetsa dipelo tsa bana Thutong ya baapostola ya Bibele.” “Mme Lesedi le tla ba teng nakong ya mantsiboya.”

¹⁹³ Ke rona bana, Modimo o moholo wa Lehodimo! Hora e fihlile! Matsoho a hodim'a batho.

¹⁹⁴ Satane, o hlotstswe. O raleshano. Mme, jwale ka mohlanka wa Modimo, le jwalo ka bahlanka, re laela ka Lebitso la Jesu Kreste, hore o utlwe Lentswe la Modimo, mme o tswe ho batho, hobane ho ngodilwe, “Ka Lebitso la Ka ba tla leleka batemona.”

¹⁹⁵ Mme batho bohole ba ke ba lokollwe. Fana ka sena, Modimo o Ratehang. O Modimo wa Lehodimo ya hlotstseng, tsatsing leo ka kgohedi hodima Thaba ya Kalvari, bolwetse le mafu wohle le mesebetsi yohle ya Diabolosi. O Modimo. Mme batho ba fodile ka maqeba a Hao. Ba lokolotswe. Ka Lebitso la Jesu Kreste. Amen.

¹⁹⁶ Modimo, sakatuku ka nngwe e robetseng mona, Moya wa Modimo o sa le teng, tlolo ya Jesu Kreste e sa dutse hodim'a batho, mme dipontsho tse kgolo tse A di tshepisitseng di a phethheha, mme lefatshe le a reketla, thothomelo ya lefatshe e a etsahala, dipontsho tse kgolo tse A di boletseng, mme Lengolo le a phethwa, mme Lesedi la mantsiboya le tjhabile. Ke robatsa mmele wa ka hodim'a disakatuku tsena, ho emela mmele ona wohle wa badumedi ho tloha Botjhabela, Bophirima, Leboya, le Borwa; le ho bolella Diabolosi, “Ka Lebitso a Jesu Kreste, tlohela mokudi ka mong eo dintho tsena di tla bewa hodima hae,” bakeng sa hlompho le tlrtliso ya Lentswe la Modimo. Ka Lebitso la Lentswe la Modimo, Jesu Kreste wa Nazaretha. Amen.

¹⁹⁷ Jwale, ka kgutso, ka kelello e sedi, ka ho hlaphohelwa, le ka dikelello tsa lona tse phodileng, jwalo ka badumedi, na jwale le a dumela le ho amohela phodiso ya lona ho tswa ho Modimo o Matlawohle, ka Lebitso la Jesu Kreste? Ha le etsa jwalo, phahamisang matsoho a lona. Bohle ka ntle dinaheng, phahamisang matsoho a lona ka ntle mono. Motho ka mong ka mona, ka moo ke bonang, ba ne ba phahamisitse matsoho a bona; ka hare, ka ntle, difesetereng, menyako, diphaposing tsa bana, le hohle, batho ba phahamisitse matsoho a bona. Ba E amohela. Satane o hlotstswe! Maqeba a Jesu Kreste a le fodisa, mme Boteng ba Jesu Kreste bo paka taba ya hore O a phela kajeno, kamehla o kgona ho boloka tshepiso ka nngwe A e entseng. Amen! Ke a Mo dumela. Lona? [Phutheho e re, “Amen.”—Mong.]

¹⁹⁸ Jwale ha re emeng ka maoto a rona. Ka Lebitso la Morena Jesu, ho amohela ntho yohle e entsweng kapa e builweng, re Mo rata ka dipelo tsohle tsa rona. Re Mo thabela ka tsohle tse ka ho rona. Jwale ha le ya malapeng a lona a fapaneng ho qala bosiusing bona, Modimo a be le lona. Modimo a le fe Moya o Halalelang ha le se na Moya o Halalelang.

¹⁹⁹ Monna ka mong, mosadi, moshanyana, kapa ngwanana, mona, ya sa kolobetswang ka Lebitso la Jesu Kreste, ho na le

diaparo, letsha. O se suthisetse se ka etswang kajeno hosasane. Hosasane e ka ba morao haholo. "Ho lekanang tsatsi la kajeno, letsatsi lena, ke bokgopo ba lona." Ho na le bareri ba emeng, ba malala-a-laotswe, diaparo di lokile. Ha ho boitatolo. Na o itokisitse? Ha o etsa jwalo, o dumele. Ho sa tsotelehe ka moo o kolobeditsweng ka teng, o fafaditswe, wa tshelwa, se e ka bang sona, ke phoso. Lesedi le fihlile. Tloong, le dumele, mme le kolobetswe.

²⁰⁰ Motho mang le mang ya se nang Moya o Halalelang, o ke o amohele Moya o Halalelang, e mong le e mong wa lona, ka matla a phethehileng a Mokgethwa le ka lerato leo A o tshepisitseng lona, ho o etsa mmopuwa e motjha ho Yena. Modimo a le hlohonolofatse.

²⁰¹ Jwale, ho fihlila Sontaha se tleng hoseng ka mashome a mararo ka mora robong, ha re bineng thokonyana eo re ne re tlwaetse ho e bina dilemong tse fetileng.

Se lebale thapelo ya lelapa,
Jesu o batla ho kopana le wena mono;
O tla jara maima a hao wohl,
Se lebale thapelo ya lelapa.

Ha re e bineng mmoho jwale.

Se lebale thapelo ya lelapa,
Jesu o batla ho kopana le wena mono;
O tla jara maima a hao wohl,
Se lebale thapelo ya lelapa.

²⁰² Jwale re sa e bina hape, tsukutlana ka matsoho le mojaki ya haufi le wena, le a bona, ha re ntse re bina.

Se lebale thapelo ya lelapa,
Jesu o batla ho kopana le wena mono;
O tla jara maima a hao wohl,
Se lebale thapelo ya lelapa.

²⁰³ Ha le Mo rate na? Ke a Mo rata. Ke a Mo rata hoba O nthatile pele le ho lefella poloko yaka (eo e ne e le kgohedi) Thabeng ya Kalvari. Ke Yona kgohedi e hodim'a Thaba Sunset, Thaba Nebo, Thaba Sinai, boiphihlelo bohole bo fapaneng ba hodima thaba. Jwale ka hona, ho lokile, ha re e bineng jwale.

Kea Mo rata, kea Mo rata
Hoba O nthatile pele
Mme A lefe-... poloko ya ka
Fateng sa Kalvari.

²⁰⁴ Bohle ba Mo ratang, e reng, "Amen." [Phutheho e re, "Amen."—Mong.] A ho be jwalo! Jwale nahananang feela seo A le etseditseng sona; nahana o ka be o le ka ntle kwana tlung ya jwala bosiung bona. Mohlomong o le lebitleng jwalo kaha ke tshwanetse, hole le mehauhelo ya Modimo. O u etseditse eng? Oh, ho ka tla jwang hore re se Mo rate? Ha ho etse phapang seo motho a se buang, ke Yena wa pele.

²⁰⁵ Ha re kwaleng mahlo a rona, mme re inamise dihloho tsa rona ha re e binela Yena jwale. O rata dipina, ho bina difela. Ha re Mo bineleng jwale.

Kea Mo rata, kea Mo rata
 Hoba O nthatile pele
 Mme A lefella poloko ya ka
 Fateng sa Kalvari.

²⁰⁶ Ka dihloho le dipelo tsa rona tse inamisitsweng ka pel'a Sefahleho sa Hae, re motlotlo ka seo re se boneng ka mahlo a rona, seo ditsebe tsa rona di se utlwileng, se ngotsweng Lentsweng la Modimo, seo tshepiso ya Hae e bileng sona ho rona kajeno. Modimo a le hlohonolofatse.

²⁰⁷ Re na le—re na le moeti hara rona bosiung bona, moena, Ned Iverson, e ne e le moruti wa Presbeteriene. Ntatae, baena ba hae, ke moruti wa Presbeteriene. Yena, ka moo ke utlwisisang kateng, o kolobeditswe kajeno, hape, ka Lebitso la Jesu Kreste. Ke moruti, mme ebile ke ea motle. Mme ke tla mo kopa, jwalo ka ha ke dumela e le mohlanka wa Modimo, ho kopa mahlohonolo a Modimo hodim'a phutheho ena le sa kgutlela malapeng a lona.

²⁰⁸ Moena Iverson, tloo ka pele, re sa inamisa dihloho tsa rona thapelong. Modimo a o hlohonolofatse, moena wa ka.



KGOHEDI KE YA ENG HODIMA THABA? SST65-0725E

(What Is The Attraction On The Mountain?)

Molaetsa wona o tlileng ka Moena William Marrion Branham, o rerilweng tshimolohong ka Senyesemane ka Sontaha mantsiboya, Phupu 25, 1965, mane Tabernakeleng ya Branham, e Jeffersonville, Indiana, U.S.A. o ntshitswe mabanteng a kgatiso a makenete mme o ngotswe o sa kgutsufatswa ka Senyesemane. Phetolelo ena ya Sesotho sa Borwa e phatlaladitswe ka 2004 ke ba ha:

©2004 VGR, ALL RIGHTS RESERVED

VOICE OF GOD RECORDINGS
 P.O. Box 950, JEFFERSONVILLE, INDIANA 47131 U.S.A.

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org